

東
華
續
錄

東華續錄

同治五

臣王先謙敬編

臣張式恭恭校

同治元年壬戌春正月甲申朔 母后皇太后 聖母皇太后御

慈甯宮 上率王大臣 慈甯門行禮 御乾清宮受朝不作樂

不宣表○諭內閣朕奉 母后皇太后 聖母皇太后懿旨恭親

王以議政王在軍機處辦理一切政務勤勞懋著加恩著在紫禁

城內坐四人轎以示優異○諭朕奉 母后皇太后 聖母皇太

后懿旨惠親王之子奉恩輔國公奕詳恭親王之子奉恩輔國公

載澂均著加恩賞戴三眼花翎惇親王之子載濂著加恩封爲二

等鎮國將軍○命兵部尙書麟魁兩江總督曾國藩協辦大學士

○乙酉諭內閣朕奉 母后皇太后 聖母皇太后懿旨天生民

而立之君使司牧之人君之職所以理萬民而使之安居樂業衣食各得其所也我朝 列祖 列宗宵衣旰食無日不勤求民隱是以蠲租肆赦之 詔歲不絕書皇帝以冲齡寅紹 丕基若涉大川固知攸濟深維出治之原必以民生爲本惻隱在抱寤寐時縈近以逆匪肆擾連歲用兵小民蕩析離居顛沛失所甚至被賊裹脅不能自拔來歸上年八月閒安慶克復官軍埽蕩東下庶能拯救生民於水深火熱之中乃浙江省垣又被賊匪竄陷小民何辜致遭荼毒哀此蒸黎寢食俱廢山東河南土匪紛擾安徽捻匪迄未撲滅四川雲南貴州廣西等省匪眾尙多雖經官軍疊次剿殺然推原其始孰非朝廷赤子豈無天良敢行稱亂良由迫於飢寒鋌而走險每於披覽章奏見其殺賊多名者未嘗不爲之惻然矜憫因是深自刻責菲食惡衣一切御用器物悉視向例裁減未

明求衣日昃不遑皇帝雖在沖齡亦當存民飢民溺之思不可稍
耽安逸前以軍餉浩繁度支不足不得已議畝捐釐捐之舉地方
有司不知善爲經理暴斂橫徵漫無限制方冀逆賊蕩平輕徭薄
賦與吾民共登衽席何堪貪吏朘削竟致民不聊生殊堪痛恨屢
諭皇帝飭令各該省督撫酌量撤畱並將殃民官員嚴行查辦至
各直省地方水旱偏災近因經費不充地方官或至諱匿不報仍
復徵收四野鴻嗷豈忍坐視江蘇安徽浙江失陷郡縣本年錢糧
業經降旨悉行豁免第小惠未孚民隱尙難徧舉皇帝深居九重
豈能周知民間疾苦是在內外文武大臣以及翰詹科道有言事
之職者博訪周諮隨時具奏使閭閻幽隱咸得上達朝廷迅速辦
理以慰視民如傷之念其各直省督撫大吏均有斯民之責尤當
妥爲撫綏所欲與聚所惡勿施庶幾感召 天和共登郅治至從

征將士兵勇棄其父母離其鄉井爲國宣勞荷戈執戟冒險衝鋒在吾民之中尤堪憫念前諭皇帝嚴諭統兵大臣不准剋扣兵餉諒必恪遵如果度支充裕必當普加賞賚以獎勤勞其原籍地方家室有司官當不時拊循傷亡兵勇子孫更宜妥爲保護勿使稍有苦累以慰其心其餘未盡事宜並酌量奏聞此皆夙夜勤求所注念非徒延訪之虛文也其各仰體奉行毋有所隱○袁甲三李世忠奏查賊竄全椒縣境軍情喫緊臣李世忠暫回滁州以衛全椒復因六合縣機有可乘親往查看先是賊目黃雅冬意欲自拔來歸因六合賊首馮懋林防守甚嚴無隙可乘屢遣其賊朱名揚約臣李世忠先將城外之賊擊敗即可內應舉事適和含敗賊竄踞滁城附近之水口地方臣李世忠激勵將弁奮勇進攻連兩商臣袁甲三抽調知府李元忠副將倪文藻分隊趕回助剿十二月

二十日臣李世忠親督總兵李顯發等帶兵分路直擣賊巢該逆列隊迎拒我軍三路並進賊棄械狂奔我軍跟蹤追殺至陳家橋地方距六合縣城僅二十餘里當派副將杜宜魁等連夜紮營李元忠進攻三汊河賊營以牽其勢李顯發等往攻六合城外賊營二十一日六合城賊出隊來撲李顯發等迎頭截擊杜宜魁等帶勇前往助戰賊始敗退李元忠旋將三汊河賊營踏毀擒斬甚多二十二日逆首馮懋林帶悍賊萬餘出城外賊營亦均出隊臣李世忠督同各將親自臨敵一面派隊繞攻賊後一面帶領李顯發等殺入賊隊斬馮懋林於陣賊眾紛紛敗潰李顯發等併力追殺直至東門賊營賊尙閉門開礮示以馮懋林首級賊眾駭竄遂將賊營五座一律踏毀總兵李昭宸等亦將西南門賊營五座乘勢占奪進逼城根黃雅冬卽於是晚遣朱名揚潛入我營約定東

門火開城接應臣李世忠乘夜派隊圍攻四門忽見東門火光燭天城門大開杜宜魁李顯發一擁而進黃雅冬與其子黃賢馨等倒戈殺賊殲斃甚多餘賊奔逃六合縣城遂於二十三日克復殺賊約計三四千名生擒二百餘名內有衝天福林幗安頂天燕汪玉城攀天侯魏正幅達天侯趙時詳及僞指揮丞相檢點等五十餘名均經正法臣等查六合一城與金陵對峙牆高池深爲江北第一要區自咸豐八年失守後屢經官軍攻剿未能得手今幸賴皇上天威將士用命擒斬首逆克復堅城洵足伸天討而快人心上諭袁甲三李世忠奏攻克六合縣城一摺辦理甚爲得手袁甲三調度有方著交部從優議敘李世忠自滁州進兵旬日之間擒斬首逆克復堅城厥功甚偉著賞穿黃馬褂以示優獎○諭袁甲三奏剿辦固鎮竄捻獲勝等語西捻竄擾固鎮經袁甲

三派兵剿辦上年十二月官軍渡澮築壘逆眾來撲我軍奮力衝擊參將劉鳳芝匹馬陷陣副都統善慶用馬隊衝突斃賊無算賊分股西遁我軍跟追二十餘里賊眾各匿各圩復經善慶等於薛家圩東大橋追殺固鎮附近已無賊蹤辦理尙爲得手在事出力各員著准其彙入克復定遠案內擇尤保奏○以江西全境肅清賞總兵官鮑超黃馬桂○丙戌諭內閣前因宋晉奏募陵規制萬古可法定陵工程可否仿照辦理一摺當經諭令王六臣等敬謹妥議具奏茲據禮親王世鐸等奏稱宣宗聖德神功巍煥千古而於陵寢規模務從儉樸制作盡善洵足爲萬世不易之規該侍郎奏請仿照辦理意在紹休法祖不爲無見惟見在定陵工程大局已定若勉強仿照募陵辦理則所備才石工料等項一切均須變更旣多窒礙轉恐稽遲等語敬惟陵寢規模

本係遵照成憲而宣宗制作之精心有超越於尋常成例之外者使該侍郎當皇考卜吉之時早建斯議則經營伊始聖心當自有權衡今工程大局已定若另行辦理勢必棄漸就之規模爲從新之剏造該王大臣所議實係準情酌理詢謀僉同自應俯允所請仍著遵見在成規迅速恭辦以期山陵及早奉安用承

安佑○諭議政王軍機大臣等前據都興阿奏金陵股匪渡江欲撲揚州當經諭令都興阿妥爲防剿茲據袁甲三等奏攻克六合請由江北糧臺撥給銀米頒賞降眾各摺片已諭知吳棠撥銀一萬兩米四千石解往六合並派委得力官辦理善後矣所有降眾二千餘人卽著李世忠妥爲安插一俟銀米解到卽行賞給此時江北官軍與滁全兵勇業已聯絡天長江浦踞匪勢已窮蹙卽著都興阿等會同李世忠各派勁兵將天長江浦兩城迅圖克復

其渡江股匪並著都興阿等速行掃蕩毋令蔓延及儀徵等處見在
苗練句黨竄擾長淮防剿亟須水師江北六合克復軍情稍鬆著
都興阿等派撥紅單船十隻由邵伯湖進三河口至蔣壩入淮駛
赴臨淮交袁甲三調遣袁甲三另摺奏遵查張落刑盤踞潁上與
苗練句連圖撲潁州陳玉城尙在廬州之雙墩集等處並無賊眾
二十餘萬連營七十餘座賈臻所奏未確等語昨因髮捻各匪撲
犯潁城勢甚猖獗已諭令李續宜速行赴援並諭令勝保帶兵南
下會合夾擊其多隆阿一軍諒已遵照前旨進攻廬州袁甲三於
潁州軍務既未能顧及仍應將附近壽州各圩設法收撫以孤苗
練之勢並嚴督定遠官兵聯絡南路團練會攻廬州逆匪以期肅
清皖北臨淮係屬重鎮袁甲三須俟李續宜到任後會同剿辦苗
練見在斷不可移兵徐州致令顧此失彼其招撫郭名棟一節卽

著該大臣商同賈臻妥爲辦理將此由六百里各諭令知之○諭
前因捻逆四出滋擾諭令袁甲三會同嚴樹森毛昶熙密籌機宜
分路進剿爲先發制人之舉茲據袁甲三奏各股捻首在江境之
銅沛蕭碭豫境之商虞永夏皖境之蒙阜毫宿築圩分踞數百里
賊巢林立臨淮一軍距賊巢均在數百里外不能分兵北路直搗
捻巢田在田駐紮徐宿距歸德較近請就近會同嚴樹森毛昶熙
分路進剿等語徐宿一帶捻匪屢經竄擾東豫肆意蹂躪非乘冬
令歸巢之際直搗賊圩春令氣候融和該匪又將外竄田在田吳
棠專辦徐宿剿匪事宜責無旁貸著卽督率所部將徐宿一帶捻
巢迅速攻克一面知照鄭元善毛昶熙分路進剿務將著名巨捻
老巢先行攻克則附近脅從小圩自可望風歸正僧格林沁一軍
見已進駐單縣距徐郡甚近並著田在田知會僧格林沁撥兵進

攻爲四面擣穴擒渠之計六合城爲江北緊要門戶該逆旣失此險要勢必併力來爭著吳棠迅派知兵文武各員前往守禦扼要駐紮並辦理一切善後事宜毋稍大意將此由六百里各諭令知之○湯雲松因病勒休以陳士杰爲江蘇按察使由候選道遷○予管帶楚軍積勞病故道員王開化祭葬卹廕如布政使例諡貞介○丁亥曾國藩奏疊奉諭旨飭催左宗棠統師援浙當卽遵催左宗棠迅速起行先是浙江之賊恐我軍進援爲先發制人之計於十一月十四日分兩大股由淳安開化竄出二十二日至徽境之街口二十六日至深渡副將張運桂派隊迎擊大捷一次小挫一次僞輔王楊輔青又率甯郡大股分兩路內犯欲取徽州休甯各城二十七日桂逆率眾萬餘竄休境之屯溪署總兵唐義訓擊走之二十八日又竄篁墩張運桂督軍迎剿獲勝楊逆糾股又撲徽郡

我軍撤回守城自十二月初二日後徽州被圍甚急張運桂率勇堅守屢次出擊獲勝賊於城外築壘不進臣思徽郡爲江皖門戶關繫甚重因調總兵朱品隆兼程回援復函商左宗棠先由徽婺夾擊再進嚴州以援浙省准左宗棠咨稱已派老湘營及駐防玉山各營前赴華埠直隸州知州劉典帶七營前赴婺源方冀各軍擊退徽賊卽乘勢入浙乃據薛煥咨稱浙江省城已於十一月二十八日失守又據署皖南道姚體備稟浙江潰兵紛紛來徽浙省文武大吏殉難甚多水陸兵勇約有六萬除陣亡及降賊外尙有萬餘人沿途又被逆匪截去多名等語臣屢奉援浙之命赴救莫及大局決裂應請旨將臣交部嚴加議處見在蘇浙兩省膏腴之地盡爲賊有賊數號稱五十萬潰勇亂民裹脅日多勢必上竄皖南內犯江西東南大局收拾愈難臣謹就愚慮所及爲我皇上

一一陳之一浙東之金華嚴州紹興甯波台州處州等府先後失
守温州被土匪竄陷惟湖郡與海甯州兩城尙存然皆孤懸賊中
亦無倖全之理綜計全浙惟衢州一府可以圖存臣擬令各軍堅
守衢州與廣信徽州相爲犄角先據形勝扼賊上竄之路左宗棠
應暫於徽衢信三府閒擇要駐紮總須先固江西皖南邊防俟徽
圍旣解兵餉調齊再籌分路進剿一慶端聞已進駐建甯查浙省
各郡之賊由分水滄遂內竄則徽州婺源當其衝由開化江常內
竄則廣信玉山當其衝若由遂昌龍泉至浦城而竄江西之鉛山
福建之光澤則浦城當其衝左宗棠以數千人分防徽信兩路斷
難兼顧閩防擬請旨飭下慶端速派勁旅嚴守浦城俾賊不得由
閩境而犯江西一浙省將軍巡撫司道各官聞多殉節所遺各缺
應請旨迅賜簡放見在蘇浙糜爛人皆視爲畏途惟有選擇能戰

之文員補授兩省實缺庶可集事一浙省兵勇向恃甯紹爲餉源該處既被賊踞無可籌畫左宗棠所部及衢州原有各軍月餉亟應另籌協款查廣東繁富之區見臻安謐擬懇恩飭下廣東督撫粵海關按月協撥銀十萬兩或由江西轉解左宗棠營或由海道駛運上海由臣轉解左宗棠營並請飭下福建督撫閩海關按月協撥銀三萬兩交左宗棠轉發衢州各營臣與撫臣毓科仍於地丁及釐金項下源源協濟以資飽騰以上四條均係目前急務至如何進取機宜臣當與左宗棠悉心籌商隨時會奏又奏查團練之法止能防小支游匪不能禦大股悍賊其練丁口糧若太多則與募勇相等不必僅以團名若太少則與兵勇迥殊斷難得其死力其團局經費若取之於丁漕釐捐四者之中則有礙督撫取財之道若設法於丁漕釐捐四者之外則更無絲毫措手之處事權

既無專屬剛柔實覺兩難晏端書之在江北不設餉局但勸各邑築圩自保龐鍾璐之在江南激勵鄉民俾知同仇敵愾之義辦理極有斟酌惟目下逆氛正熾斷非團練所能奏功應俟大功將竣之際辦團以善其後庶幾有益無損晏端書龐鍾璐清操雅望內任最宜應請 皇上天恩撤去團練差使仍飭回京供職所有江南江北應行團練之處卽責成地方大吏督率官紳妥爲經理左宗棠奏 臣 蒙恩命督辦浙江軍務當茲全浙鼎沸何敢稍事遷延正擬布置進兵接署金衢嚴道江允康等稟報十一月二十八日逆眾攻陷杭城 臣 奉旨援浙坐視列郡淪胥罪何可追查浙江軍務之壞由於厯任督撫全不知兵始則竭本省之餉以濟金陵皖南各軍圖藉其力以爲藩蔽而於練兵選將之事漫不經心自金陵皖南大局敗壞後又廣收潰卒糜以重餉冀其復振卒之兵增

餉絀軍令有所不行局勢遂致決裂見在通盤籌畫非就見存兵力嚴爲淘汰束以營制不可非申明賞罰予以實餉不可非另行調募豫爲換補不可然欠餉已久則有不能汰遣之患餉需不繼則有不能調撥之患經費不敷則有不能募補之患臣名雖節制提鎮實則營官哨長呼應不靈此事之應辦而不能辦者前經奉旨令江西撫臣籌解臣軍餉銀十萬兩此時江西司庫空虛恐難速解至慶端前請飭催臣軍入浙時已豫將臣軍之餉諉之江西迨經奉旨按月籌撥銀十萬兩臣卽與慶端咨商揀派實缺司道設立糧臺督臣派江允康辦理其事而江允康來稟轉向臣請領米糧軍火明知臣軍欠餉已多故意刁難臣軍入浙後餉需無出縱令竭力圖維何從措手應請旨飭下部臣查明各省應協浙江之餉閩省及各省奉旨撥解援浙軍餉趕緊徑解廣信府交臣後

路糧臺以應急需一面由部臣開單知照如各省撥解遲延及委
員逗畱貽誤均由臣隨時咨部查取銜名據實參奏又奏再臣自
上年襄辦軍務卽召募勇丁五千餘名訓練兩月率以東行轉戰
江皖之間尙能得力會國藩屢次函商募足萬人臣以謀餉維艱
人才難得未敢徑諾見雖續增至八千餘人除畱防婺源四營外
能戰者不滿七千兩浙徧地賊氛臣以孤軍轉戰而前勢難分布
查廣西臬司蔣益澧任事勇敢本年春間以臣軍太孤願率所部
助剿廣西巡撫劉長佑新授貴州巡撫江忠義湖北巡撫李續宜
署四川布政使劉蓉皆臣氣類相許之人所部素多勁旅江忠義
亦會商商願爲臣募選將士助剿劉長佑已擬派副將戴盛寬挑
勇五百名前來尙未見到湖南撫臣毛鴻賓亦願助臣一營月餉
見在浙江全局已壞急宜挽救應請旨飭令廣西撫臣劉長佑速

催蔣益澧統帶所部募勇數千並飭副將戴盛寬速帶所部一營
星速前來以當一路並請飭令江忠義李續宜劉蓉各選一兩營
前來又貴州提督田興恕所部亦多驍勇之士一併請旨令其遴
選勇丁千名派總兵沈宏富管帶來浙由臣調遣以上請調各營
蔣益澧所部應請飭下兩廣督臣勞崇光籌給行資其由湖南江
西經過各營行資應由各該省發給臣見咨商毛鴻賓毓科派員
勸捐軍餉並請飭下戶部速發實職虛銜等項執照一千張分交
湖南江西撫臣飭司轉發以期集事其部照未到以前卽由湖南
江西撫臣挪墊開銷歸入援浙捐款造報又奏浙省水陸通途衢州鎮總
州府一城該處爲江西福建樞紐又爲浙省水陸通途衢州鎮總
兵李定太所部八千五百人兵力不爲不厚然兩次大股賊匪經
過李定太僅守一城未能截阻衢屬各縣任賊縱橫毫無布置見

署衢州鎮總兵崇志聞其技藝尙優然未經戰陣尙不可恃新授
總兵朱品隆隨征皖南勢難赴任查有前浙江處州鎮總兵劉培
元見在湖南帶勇熟諳水陸戰事欲復浙省必於衢州設立水師
以助陸戰劉培元人地相宜請旨飭下湖南撫臣速令劉培元募
勇三千人來衢卽署理衢州鎮總兵以資得力其劉培元未到署
任以前衢州防務仍責成李定太經理儻敢再事玩泄臣卽行據
實嚴參上諭議政王軍機大臣等會國藩左宗棠各奏浙陷徽
圍通籌全局以圖補救並請調各路兵餉各摺片當卽降旨均照
所請分別辦理矣會國藩自請嚴議之處前因浙省失陷已將該
督交部議處毋庸更議當茲事勢阨危該大臣受國重任惟當與
左宗棠同心勦力宏濟艱難力圖恢復以挽東南全局方爲不負
委任不在區區小節引咎自責也浙蘇兩省膏腴盡爲賊有窟穴

既成根柢已固亂民潰勇裹脅日多勢將上竄皖南內犯江西以擾我軍後路全浙所存雖尚有湖郡海甯州兩城又孤懸賊中獨衢州一府尚可圖存如該大臣所議左宗棠一軍惟有擇要於衢徽與廣信三府之閒相機調度飭令衢州各軍堅守與徽信相爲犄角先據形勝以固江西皖南邊防一俟徽圍得解卽當調齊各軍分路進取其所請調之蔣益澧各軍業經寄諭劉長佑卽飭該員迅率所部與戴盛寬帶勇五百速赴浙營並諭李續宜江忠義及駱秉章傳諭劉蓉均各精選一兩營之兵田興恕派令總兵沈宏富帶勇千名赴浙助剿惟該員等均恐一時難以速到事機如有可乘該撫務當及時進取諒不至以坐待濟師轉滋貽誤所請浙省各官迅賜簡放卽日已將蔣益澧簡放浙江布政使曾國荃簡放浙江按察使曾國荃久歷戎行與該大臣講求親切庶足與

左宗棠指臂相聯以期有濟蘇浙糜爛省分人皆視爲畏途誠如該大臣所奏惟有選擇能戰之文員以補兩省之實缺或能漸集乃事並著會國藩左宗棠隨時訪查將能勝蘇浙兩省監司道府之員保奏前來以備簡用閩浙督臣慶端自聞浙警卽飭該督援勦屢次遷延弗進姑照會國藩所議諭令該督駐師浦城與左宗棠等軍聯絡第恐未必得力其餘福建吏治官常不能振作早有所聞並著會國藩詳加訪察如閩省督撫均屬未能勝任卽行據實奏參毋避嫌疑並將能勝該省督撫之員採訪確實列名具奏浙省軍情萬緊餉需自不能不寬爲籌備前薛煥奏杭城危急會照王有齡所籌將廣東每月協浙餉銀五萬兩江西湖南湖北每月協浙餉銀各三萬兩均由上海豫納中外商人貨稅給單執赴各省抵滙浙餉卽由薛煥收集此項抵餉設法運浙寄諭各該督

撫遵照辦理其各省如有海道及各路可通浙省者均卽各將應
協月餉分途解運本日又經寄諭各該省卽遵前旨妥辦接濟左
宗棠軍營並將會國藩所請福建閩海關撥濟浙江月餉三萬兩
諭慶端等撥解交左宗棠軍營廣東粵海關撥解月餉十萬兩諭
勞崇光等或由江西轉解左宗棠軍營或由海道駛運上海由會
國藩轉解左宗棠軍營總期得以迅籌接濟俾利軍行因思上海
雖僻處一隅勢如累卵而該處華洋商賈輻輳餉源甚裕如能協
力保全得人而理於餉需籌濟定屬有裨且能緩急就近應手著
會國藩左宗棠悉心籌畫昨薛煥有據蘇省紳民公呈請借洋人
剿賊之奏當經從權諭令該撫熟計以期無拂輿情諒該大臣早
能洞悉仍須該大臣酌派名將勁兵前往方可萬全無患各省團
練大臣均已陸續撤回龐鍾璐晏端書兩員此時恐尙各有經手

事件著會國藩仍遵前旨催飭李鴻章帶領所部前赴鎮江將江南北各事宜妥爲接辦昨據袁甲三奏六合縣城已克復則天長自可得手李鴻章到鎮後可與都興阿聯絡聲勢籌商進剿機宜屆時卽可將龐鍾璐等撤回劉培元所部到防該撫卽行馳奏以便降旨令權衢州總兵卽可將李定太酌撤其未到以前仍暫將衢防責成李定太妥爲經理毋任貽誤左宗棠雖經簡放浙撫一切進兵機宜仍著與會國藩通籌大局不可以身任地方爲職守所牽稍涉拘泥蘇常爲財賦之區如果兵力可以規復卽著會商辦理毋失機宜會國藩節制四省昨又簡授協辦大學士其敷乃腹心弼予郅治朕實有厚望焉將此由六百里加緊各諭令知之○諭左宗棠奏浙江全局已壞亟應設法挽救等語見在左宗棠亟籌恢復浙省若非厚集兵力無以利攻剿之資蔣益澧已簡授

浙江布政使著劉長佑催令統帶所部挑募勇丁數千名並飭副將戴盛寬速帶所募一營星速前赴左宗棠軍營以當一路至湖南四川貴州軍務方殷湖北邊境雖已綏戢尙須籌畫東征均有難以分撥之勢惟浙江全省糜爛時局攸關亦應先其所急著李續宜江忠義並著駱秉章傳諭劉蓉悉心籌畫各精選一營兩營派員管帶田興恕所部亦多驍勇之士並著遴選勇丁千名派總兵沈宏富管帶星速前往浙江均由左宗棠調遣其由湖南江西經過各營行資著毛鴻賓李桓籌款給發毋得遲延貽誤蔣益澧所部整裝經費已諭令勞崇光籌給矣另片奏浙省僅存衢州一城李定太所部雖多毫無布置請飭劉培元募勇來衢卽署理總兵等語衢州地勢爲江西福建樞紐又爲浙省水陸通途必應設立水師以爲陸戰之助劉培元熟諳水陸攻戰機宜著毛鴻賓飭

令募勇三千前赴衢州其所帶湖南水師卽著毛鴻賓遴選妥員
管帶再湖南在籍道員陳士杰已簡放江蘇按察使著毛鴻賓傳
知該員迅速募勇四千名馳赴安慶軍營聽候會國藩調遣將此
由六百里加緊諭知田興恕駱秉章毛鴻賓李桓劉長佑李續宜
江忠義並傳諭劉蓉知之○諭前因薛煥奏浙省危急請照王有
齡所籌前經准撥之廣東每月協餉銀五萬兩江西湖南湖北每
月餉銀各三萬兩均由滬口豫納商人貨稅給單執赴各省抵滙
浙餉當經諭令各該督撫遵照辦理左宗棠一軍待餉孔亟所關
非細著官文勞崇光耑齡李桓嚴樹森毛鴻賓薛煥等各遵前旨
迅將浙省協餉仍如前議由薛煥收集解交會國藩轉解左宗棠
軍營一面由各省通浙路徑分途撥解總期迅速解到俾利軍行
又本日已將蔣益澧簡放浙江布政使飭率所部赴浙調遣著勞

崇光籌給行資口糧俾得星速成行其會國藩所請廣東每月協餉銀十萬兩著該督等迅籌撥運上海餉源寬裕並著薛煥於滙抵餉項外先行設措接濟並按月源源解往毋許推諉將此由六百里加緊各諭令知之○諭據會國藩奏稱浙省賊勢鴟張若由遂安龍泉而竄江西之鉛山福建之光澤則浦城當其衝請飭慶端嚴扼浦城等語浙省自杭垣失守徧地賊氛駸駸有分犯江西之意前諭慶端駐紮閩浙交界地方並飭曾元福等兵勇赴浙原冀與左宗棠援師會合進剿見在軍情變遷左宗棠擬駐衢城再圖進取則曾元福顏青雲等軍自未便孤軍深入著慶端督帶各軍迅速進紮浦城以杜逆賊旁竄廣信鉛山繞出左宗棠後路該督兼轄浙省此次救援屢因延緩貽誤本有應得之罪若再不能力扼浦城則其罪愈不可追斷難再邀恩宥左宗棠駐軍衢州務

當聲息相通如有調遣之處不得稍有掣肘致干重咎再會國藩
奏左宗棠軍餉請飭閩海關按月協撥銀三萬兩等語卽著慶端
瑞璜轉咨文清按月迅速解交以濟要需將此由六百里加緊各
諭令知之○諭前有旨授彭玉麟爲安徽巡撫幫辦袁甲三軍務
因彭玉麟自陳不諳吏治懇請開缺已俯如所請將李續宜調補
安徽巡撫李續宜奉旨後計已統帶得力兵勇馳赴皖省著卽會
同袁甲三將剿辦苗練事宜密速籌商妥爲辦理前據袁甲三奏
賈臻才不勝任兼係病軀又據賈臻疊次馳報苗練勾結陳逆圖
撲潁州情形萬分危急昨據袁甲三奏稱陳玉城尙在廬州之雙
墩集等處賈臻所奏賊眾二十餘萬連營七十餘座實無其事賈
臻甚其詞說希圖聳聽實屬可惡李續宜到皖後卽將賈臻撤任
其所帶兵勇及經手事件由該撫派員接辦並著袁甲三李續宜

將其妄報軍情各節確查覆奏再降諭旨前有人奏張學醇以知縣帶勇剋扣餉銀與苗沛霖結拜兄弟委曲逢迎不顧大局徐曉峰帶勇攻圍余家圩三月之久未獲一匪迨該匪遠竄後該員卽以攻破賊圩斬獲千餘級具稟等款據彭玉麟訪聞該員等被參各情均屬有因該二員久在袁甲三軍營難保不受其蒙蔽著卽會同李續宜查明參辦不得以保擢在前稍存回護將此由六百里各諭令知之○諭田在田奏攻克汴塘賊圩等語汴塘雖經克復然賊匪向北敗竄與劉添祥等股匪又合仍恐不免旁竄且有腹背受敵之慮該處與山東地方毗連道路四處可通僧格林沁駐軍曹郡必須嚴密防範遏其分竄之路著卽分兵兜剿以期迅速殲除譚廷襄辦理設汛安營各事宜是否已臻周妥著遵奉前旨與僧格林沁籌商添兵策應並嚴飭沿河各地方文武員弁督

率鄉團實力巡防口岸毋稍疏虞清淮屢爲賊匪窺伺難保不再圖竄擾吳棠有幫辦剿匪之責更宜合力防剿毋令分竄至田在田所部各軍餉需支絀著吳棠於江北糧臺無論何款迅籌撥解俾免飢軍譁潰將此由六百里各諭令知之○以蔣益澧爲浙江布政使蘇鳳文爲廣西按察使

由左江道遷

○以會國荃爲浙江按察

使

候補按察使

○戊子諭內閣前因紹興等府縣相繼失陷王履謙以

在籍大員幫辦團練漫無布置臨難倉皇出城猶復居心巧詐飾

詞委卸當經降旨將該員革職拏問交會國藩查辦茲據慶端奏

稱王履謙由甯波赴閩乞援等語王履謙於紹興失守之後猶不

思激勵民團力圖補救乃徑行渡海藉口乞援實出情理之外王

履謙既赴閩省距會國藩軍營較遠著改交左宗棠將該革員拏

問嚴行審訊按律治罪○諭議政王軍機大臣等賈臻奏圍城逆

匪環逼請飭勁旅赴援一摺逆匪圍撲潁州自上年十二月屢經參將馬陞道員葉春培等督率兵勇分布四城戰守頗爲得力惟晝夜撐持疲憊實且糧餉將盡恐難爲持久之謀自應添兵援剿因查總兵博崇武尹善廷慶瑞等均各帶兵在潁州一帶駐紮何以毫無策應著袁甲三嚴飭該總兵等各率所部迅赴潁州協同潁郡各軍併力兜剿如敢遷延遲誤卽將該總兵等從嚴參辦李續宜調補安徽巡撫後已有旨令其赴潁壽督辦皖省剿匪事宜勝保前已諭令帶兵南下見在潁事日棘勝保卽應迅籌援剿剋日趕到賈臻當就見有兵力以戰爲守不得專待援師致滋貽誤將此由六百里各諭令知之○諭昨據左宗棠滙陳援浙布置各情形已諭令暫扼衢州再圖進剿因思浙省兵勇本有五六萬人之多平日挾制官長擾害地方以致浙省被賊竄陷見在該兵勇

降賊及爲匪者諒復不少而衢徽等處已有逃勇紛紛前往若不設法收集必致爲害地方著左宗棠卽行派員招集其馴良羸弱者盡數遣回儻有桀驁不逞之徒卽分別正法以肅軍令至總兵况文榜前據薛煥奏於城破之時因傷病離營羅大春吳再升副將貴廷芳陳步高等在城外紮營紛紛潰退深堪痛恨此等恇怯無能之將斷不可久稽國典著左宗棠一併傳旨拏問按照軍法從事浙江藩司林福祥於杭城喫緊之時不思固守輒以帶兵防堵諸暨爲詞迫賊撲諸暨不能抵禦退守義橋見在杭城已陷該員查無蹤迹饒廷選前守杭城頗著勞績此次赴紹興一帶防剿竟未與賊交鋒甚爲畏葸以上各員均著左宗棠查明下落如其情尙有可原卽行傳旨拏問分別定議儻有退避等情必當會同會國藩奏請嚴辦浙省因軍律不嚴兵驕將惰卒誤大局務當引

爲前車之鑒不可稍有濡忍庶號令嚴肅用副委任將此由五百里諭令知之○諭福建糧道趙景賢於上年十月內簡放見在尙未赴任聞其在湖州本籍帶團勦賊謀略兼優戰功最著刻下需材孔亟員缺久虛著薛煥左宗棠密速設法傳諭該道如湖州紳士中有膽略素優士民悅服之員可資接替卽著該道將經手事件交代輕裝赴任儻能移其捍衛桑梓之力以保障閩疆厥功亦屬甚偉該道起程後卽著薛煥左宗棠迅速具奏將此由六百里各諭令知之○官軍復安徽建德縣城○以賊陷紹興蕭山等府縣城奪提督陳世章職逮問○己丑命山西陝西月撥銀二萬兩濟河南軍餉調西安馬隊一千名赴河南助勦○庚寅諭議政王軍機大臣等前因賊匪攻撲鎮江諭知會國藩催令道員李鴻章統帶水陸各軍速赴該郡並因六合收復令都興阿等速攻天長

江浦以清江北茲據都興阿奏江防水師獲勝探聞天六踞匪獲髮投誠業經李世忠招撫並派兵赴援鎮江各等語鎮江一城爲江南北樞紐至關緊要馮子材等堵剿未能得手業經都興阿派委總兵詹啟綸督帶兵勇前往援救卽著催令星速渡江相機助剿見在賊勢趨重鎮江而金陵蘇常各匪復圖竄擾江北李鴻章所統水陸各軍六七千人如能早行趕到不獨鎮城可資保衛亦可壯江北聲勢著會國藩催令該員迅速起程無稍遲緩馮子材等防守鎮江務須於賊眾將至之先派兵迎剿儻俟其進逼城圍或將附近沿江城卡占踞必致勢成坐困卽著該總兵等悉心籌策勿誤機宜江防水師雖經獲勝惟壽興沙等處賊匪亟應掃蕩淨盡以固北岸藩籬所有西路防務仍著嚴密布置江浦賊已窮蹙及其餘被占地方均著該將軍等速籌攻克再前因甯波鎮海

失守經都興阿調派總兵鞠耀乾統率所部駛赴吳淞口扼勦惟據薛煥奏稱杭州失陷以後逆賊數十萬水陸分趨滬瀆兇燄甚熾所有吳淞口師船如須續調以厚兵力卽著都興阿等速爲派撥上海近日情形並著都興阿馮子材等就近確加偵探隨時馳奏將此由六百里各諭令知之○諭前因潁州軍務緊急諭令勝保統兵南下茲據嚴樹森等奏苗沛霖圖踞壽潁然後窺伺中原爲患最巨將偵探情形開單呈覽並據步軍統領衙門奏訓導元毓珍等以潁州被困危急等詞呈請求救據情陳奏各等語此次髮捻窺潁其爲苗沛霖勾結前來固無疑義勝保到潁後該練必以詭辭求撫慢我軍心斷不可墮其術中使得行其步步進逼之計該練旣已踞有壽城兼立十營根柢深固黨與極多固無可撫之理剿亦重煩兵力惟應智取以除巨患苗沛霖之殘暴眾所不

容其黨半皆勉強偏脅該大臣務當密速籌辦勿以遲疑致爲所
窺誠以該練居心叵測即使目前就撫日後亦必反覆該大臣矢
志公忠諒能計及久長不至以暫顧目前將就了事也嚴樹森等
節略及元毓珍等呈詞均著鈔給閱看李續宜調任皖撫後疊經
寄諭該撫帶兵赴皖該大臣務當和衷共濟以期迅掃賊氛將此
由六百里密諭知之○諭苗沛霖陰險很悍實爲中原巨患本日
已諭勝保密爲籌辦惟蒙亳潁霍一帶村圩苗逆分布黨與融成
一片近又勾結粵捻首逆圖撲潁州潁郡西南北三路均與豫境
歸陳汝光處處毗連光固又有潘四一股偏處是豫境邊防萬分
喫緊勝保刻下督兵赴潁嚴樹森將赴湖北新任歸陳一帶係毛
昶熙專責鄭元善統轄全省責無旁貸惟當和衷商酌派撥精兵
分投防剿張曜一軍如平輿得手應派往何路策應並著妥商布

置毋令苗練有隙可乘擾及腹地其蒙亳捻股及汝甯踞賊正息土匪並直東教會各匪肆行紛擾亦應分兵援應妥籌兼顧以期次第肅清吉林黑龍江與俄國接壤其馬隊未便分撥已諭托明阿調撥西安馬隊一千名赴豫防剿此項馬隊到時須勤加訓練如一時未能趕到卽著咨商僧格林沁酌量分撥以資攻剿將此由六百里諭令知之○以欽差大臣勝保移軍安徽潁州命正白旗漢軍副都統遮克敦布馳往直隸山東交界地方會同道員王榕吉接辦防務○命總兵李續燾陳由立各募勇三千赴河南聽卯元善等調遣○予喀什噶爾被戕從九品管玉文祭葬世職○辛卯以孟春時享 太廟 上前期親詣行禮○諭內閣田興恕奏官軍收復平越州城一摺貴州苗教各匪盤踞平越州城阻我軍進剿下游之路上年九月閒經田興恕派令總兵楊巖寶等先

將浙硃賊卡並高坡賊營次第攻毀副將梁正秀等鼓勇直進分
攻各門逆首楊八亡率眾抗拒適同知高本仁帶領兵練鈔襲匪
眾同城拒守楊巖寶梁正秀等潛約內應奪開東門高本仁等亦
將西門攻破苗民內應助剿斃賊無算餘匪踰城潛逃立將平越
州城克復其燕子塘等處賊營並於十月初四日一併蹋毀著田
興恕督飭各將弁乘勢進攻將著名逆首悉數殲擒並將近城賊
壘次第掃蕩毋畱餘孽○諭議政王軍機大臣等據僧格林沁奏
迎剿皖捻並遵籌剿辦竄匪及譚廷襄議覆直東防剿事宜各摺
片畿輔地面見無大股賊蹤卽有零星匪黨譚廷襄一軍駐紮東
昌足資剿辦僧格林沁仍隨時統籌兼顧以固北路藩籬前據毛
昶熙袁甲三各奏請令僧格林沁移軍亳州及派兵扼剿東竄捻
股據該大臣覆稱北路之防尤較南路喫重見在捻逆復竄至豐

縣調撥馬隊前往迎剿斷難抽兵兼顧徐宿且一經分撥賊眾兵單奔馳數百里間既恐緩不濟急裹積亦非易易惟有各路統兵大員暨各督撫認真防守汛地四路同時合籌進剿一俟何路逼近賊巢各路官軍聲息相通互相聯絡以爲擣穴擒渠之計田在田統軍徐宿防剿捻匪東竄是其專責僧格林沁統軍北路以固藩籬兼圖節節進剿所請令吳棠移紮徐宿會商之地已諭令酌度情形卽行稟復該大臣矣袁甲三駐兵臨淮卽應控制南路鄭元善毛昶熙等扼守河南以杜捻匪西竄各將本汛嚴行備豫爲通力合作之謀向來各路帶兵將帥往往於無賊之時並不籌思進剿一遇有警卽以賊眾兵單請飭應援爲詞該大臣等務各隨時豫爲合謀刻以滅賊爲心毋蹈從前惡習如有臨時事機貽誤斷不能倖邀寬宥也副都統德楞額會攻汴塘未能遏賊東竄譚

廷襄片奏該員恐不得力亦與僧格林沁所奏略同田在田前奏
攻克汴塘既有不實不盡何以不卽一併奏參著僧格林沁卽行
查明據實具奏德楞額如果不能得力亦卽嚴參遮克敦布到防
據譚廷襄奏應駐濮范之間該撫駐紮東昌嚴防北路並於郡西
南朝城縣派撥馬步千餘與濮范兩軍犄角其羅家河口應紮一
軍安河東卽以安河西均著僧格林沁妥商調撥冠縣館陶邱縣
臨清久經匪擾仍應酌駐一軍以護直省南界此事關係直東防
務甚爲緊要勝保畱兵會否議定扼要駐紮譚廷襄所部馬隊不
敷調度並著僧格林沁卽量爲酌撥俾資分布僧格林沁所奏東
路防堵惟運河一道尙可憑藉應令傅振邦帶領登萊等府團練
駐紮運河北岸窯灣海贛一帶與德楞額聯絡守禦之處著俟該
員到防辦理將此由六百里各諭令知之○諭前據吳棠奏稱接

奉前旨酌量地方情形應行駐紮清浦居中調度本日復據僧格林沁奏自上年八月滄河南北股捻如劉添詳劉添幅等竄入東境均經痛剿而回恐難甘心其李加英一股尙未大受懲創見聞出汴塘東竄有赴僧格林沁軍營投誠之南捻魏希元曾將此情稟知吳棠昨又具稟探聞各股捻匪巢中乏食卽欲今正羣股大舉北竄等情請飭吳棠將清淮防務辦理妥協迅速回徐駐紮等語吳棠移駐清浦前奏加築土圩安營集練各事宜自當辦理就緒見聞羣捻又將北竄徐州地屬緊要僧格林沁急欲得人商辦惟清口距徐郡尙遠著吳棠酌量如可前往卽將清浦防剿料理妥實擇員接辦抽身一行與僧格林沁會商剿撫之策如不能前往或新任徐州道張富年亦可稟商卽著迅速知照僧格林沁總期於事機無誤上年十二月有南捻立棱眼等股竄至山東金鄉

魚臺一帶經僧格林沁派軍迎剿賊復竄向東南豐沛一路遁走
田在田統軍徐宿防剿捻匪東竄是其專責前經奏報攻克汴塘
賊巢如果屬實何至南捻紛竄接應逆首劉平出圩見復蔓延淮
東殊恐所報軍情不實不盡本日已將會剿汴塘之副都統德楞
額暫行摘去頂帶責令帶兵自效以贖前愆著田在田即將前奏
實在情形明白回奏見在通飭各路統兵將帥合力剿捻互相策
應不准遷延貽誤儻仍前玩泄或粉飾戰功入告賊至卽以兵單
賊眾請飭應援爲詞事機先誤揆厥所由必當治以應得之罪決
不寬宥也將此由六百里諭令知之○諭前有旨令李續宜帶兵
赴皖撫新任該撫接奉寄諭後計已趕緊起程矣本日據勝保奏
稱剿辦潁州各匪必須與該撫南北夾擊一切應和衷共濟以期
相得益彰等語勝保膽略頗好帶兵殺賊勇往直前惟意氣自矜

喜佞惡直約束兵弁不能嚴肅以致物議沸騰疊經嚴旨訓飭該大臣近亦頗知悔悟人材難得不能不節取所長又以潁州情形日緊袁甲三不能繞道赴援該撫亦一時未能卽到賈臻困於圍城疊次飛章告急是以令勝保前赴皖省與該撫會同勦辦李續宜平日以皖事自任忠藎素著諒能與勝保會商妥辦毋誤事機斷不可豫存成見謂勝保非可與共事之人致生齟齬也將此由六百里諭令知之○諭駱秉章奏官軍克復丹棱藍逆授首見在移兵進擣青神一摺覽奏實深欣慰駱秉章自入川境後疊次獲勝早知其必能迅速奏功茲據詳陳連旬追勦每戰必勝逆首藍潮鼎經兵勇叢矛刺斃藍潮柱率眾逸出復經彰明江油石泉等縣團練陸續搜斬所存止二百餘人已遁入金光洞砂窩子萬山積雪之中嘗洪發殘匪千餘逃至富順隆昌等處軍械全無經該

督派團洗勦計日可期就殲勦辦殊快人意具見該督調度有方將士用命故能如此得手諒藍營二逆餘匪各該處團練亦必能悉數殲除其謝寡婦等匪未知是否已在誅數抑或與營逆一併逃竄從前川楚教匪滋事往往因官軍追勦緊逼遁入萬山之中逾時復出此時李逆尙踞青神內乏食而外無援自應移得勝之師前往進勦不值因殘敗餘匪牽掣第恐深山密箐該府縣官員及紳練或憚於搜捕實非除惡務盡之道著駱秉章嚴飭各府縣官員紳練務當實力搜捕淨盡不可畏難苟安見在各省地方頗多糜爛卽山陝完善之區亦屬勢等厝薪必須得人而理方能消患未萌但人才難得其守潔才優堪稱循吏者已屬寥寥而山陝等省兼須知兵大吏整頓營伍爲未雨綢繆之計駱秉章久任封圻老成宿望中外共知其幕友左宗棠劉蓉次第超擢前日所保

之道員韓超已簡放貴州巡撫諒該督平日所知堪勝封疆藩臬者尙不乏人著卽開單具奏不必拘定資格官階均可酌保候旨錄用當此需才孔亟亦不能盡得全材該督所保之員總以知兵爲上循吏次之不妨將其所長何處所短何事詳細註明庶不至用違其才該督爲朕股肱心膂之臣諒必樂於進賢斷不肯以無員可保一奏塞責也在籍提督孔廣順總兵馬德昭前已有旨令略秉章飭其來京聽候簡用見在北路無知兵之將營伍防務亟須講求著該督催令迅速起程來京其餘如有可以調赴北路得力將弁並著該督隨時察訪具奏將此由六百里諭令知之○調陝甘督標等兵二千名赴安徽潁州軍營○壬辰袁甲三李世忠奏臣等於克復六合後卽擬乘勝進攻天長臣李世忠以明攻不如暗襲飭黃朝棟將所部降眾挑選五百人暫緩薙髮爲豫備襲

城之計適黃朝棟舊部天長賊目王登壽來營投誠而守城賊首陳仕明素與黃朝棟交好卽令黃朝棟專函招撫仍飭王登壽趕回密遞一面選派隊伍令黃朝棟帶領前進臣李世忠督兵繼之二十五日兵至城下給稱賊援已到陳仕明正在城上巡視開門接應總兵王茂元李昭宸等奮勇衝入臣李世忠督隊繼進賊眾驚亂我軍與陳仕明之眾四面兜殺將負固賊眾擒斬殆盡天長縣城遂於是日克復陳仕明部眾數千人飭令一律薙髮分別遣散地方均就肅清臣等查天長東接揚郡北界清淮爲皖省東南要隘久爲賊踞今賴 皇上天威賊首帖然歸正成功甚易不特皖北可望肅清卽高寶清淮一帶亦無南顧之憂在事出力文武員弁勇丁可否彙入克復六合案內擇尤酌保出自 聖主鴻施再探聞金陵賊眾竄至滁全交界之小店地方臣李世忠將天六

布置靡定卽行回滁相機勦辦乘勢規復江浦仍畱候補道李元忠暫駐天長安爲料理袁甲三奏查李世忠駐守滁州經臣多方激勸竟能星夜奔馳辦理內應於三日之內連克二城實於軍務大有裨益應請酌予賞件以鼓其氣責令將江浦浦口收復惟此次天長之克該提督收撫降眾數千人臣已飛函屬令覈實去畱以節經費可否請旨飭臣督同李世忠遇有降眾分別遣散勿許多畱之處恭候 聖裁 上諭內閣袁甲三李世忠奏克復天長縣城一摺所辦甚爲得手江南提督李世忠忠義激發於三日內克復六合天長兩城實屬謀勇兼長著賞給珊瑚豆大荷包二對小荷包四箇白玉翎管一枝四喜搬指一箇白玉煙壺一箇白玉佩一件以示優獎仍卽督飭兵勇將江浦浦口一氣收復痛掃逆氛○袁甲三奏疊奉諭旨飭查賈臻奏報粵匪情形並廬郡是否

克復遵查張逆於十二月初十前後竄近潁郡官兵疊次出城迎
剿聞賊已退至潁東數十里至賈臻所奏陳逆踵至正陽關及續
撥粵逆入萬並無其事其程保民於南照等處屯踞之說不爲無
因查程保民本住潁東之程家圩因該圩被苗沛霖攻破遂投入
粵逆臣已屬其族人專信開導招徠能否反正尙未可知見在廬
郡未經克復南路防剿喫緊李世忠又在天六一帶連次克城隊
伍萬難抽撥是以先經函致道員蔣凝學妥籌援剿據該道函稱
賊匪欲出光固並鈔六霍後路分我兵力已稟請官文李續宜等
調馬步迅由光固一帶迎剿至廬郡情形疊據探報陳玉城與陳
得才互相疑忌陳玉城恃其黨眾欲令陳得才帶隊由西鄉前往
壽州一路會晤臣卽飭遊擊吳殿元攜諭先往西鄉會同該處團
練設法截賊去路並屬招撫陳得才率黨攻擊英逆見在楚師克

復巢縣六安舒城均有勁兵堵截廬賊竄路既窮止有潁壽尙通一綫自當會合楚師一體防範惟李續宜來函謂欲清皖北必力爭廬壽俟楚撫接替有人卽可督師入皖彭玉麟來信謂未能舍舟登陸曾國藩亦言彭玉麟不能遽離水師擬令楚軍知會臣營先規廬郡臣自當隨時商辦至賈臻所奏苗沛霖已赴臣營乞撫一節並無其事惟據前次派往之署壽春鎮博崇武及勝保委員州同方模勳等同營面稟附近壽州各圩民薙髮漸多似有轉機臣已飭令傳諭苗沛霖如能速除潁州之賊自明心迹再行斟酌辦理上諭議政王軍機大臣等袁甲三等奏稱克復天長縣城分別勦撫一摺天長東接揚州北界清淮爲皖省東南要隘此次裏應外合成功甚速皖北可望肅清卽高寶清淮一帶亦無憂南顧見聞金陵賊眾有竄至滁全交界小店地方李世忠將天六布

置稍定著卽回滁相機勦辦並卽乘勢規復江浦浦口節節掃蕩以斷賊援而通進兵之路天六兩縣都興阿在江北當可就近派軍駐守著卽咨商辦理以便李世忠盡率所部以爲進圖江浦之計天長降眾著該大臣酌量遣畱見當餉項支絀此後遇有降眾並著袁甲三督同李世忠分別遣散毋許多畱以期餉不虛糜功歸實用另片奏探悉潁郡情形並函商楚軍進勦各等語苗練乞撫萬不足恃勝保已報啟行赴潁恐其到皖於招撫一節亦無把握李世忠所部此時旣難撥往潁郡該大臣業據道員蔣凝學稟請官文李續宜添調馬步由光固進勦著卽隨時咨會辦理楚師克復巢縣尙未據有奏報舒六見有楚軍堵截廬州賊匪竄路已窮惟有潁壽一綫可通自當速與楚師會商聯絡力爭廬壽便可西平苗練北剿捻逆潁州軍情雖賈臻奏報迹涉張皇如該大臣

所奏各情亦係得自傳聞惟當隨時確實偵探妥籌兼顧勿稍大意將此由六百里諭令知之○癸巳諭內閣前據御史劉有銘奏請開墾南苑荒地當經降旨令管理奉宸苑王大臣會同戶部派員履勘並令該王大臣妥議具奏茲據醇親王等奏酌議招募佃戶開墾南苑拋荒地畝情形請旨辦理等語南苑爲我朝肄武之地列聖疊降諭旨禁止私墾聖訓昭垂舊制豈宜輕改見據該王大臣查明每年招佃徵租爲數無幾未便因小利而違成憲致於體制有乖所有開墾南苑地畝著毋庸議醇郡王另片奏該王府頭等護衛壽錕在外冒稱承辦南苑地畝索詐錢文請交部審訊等語壽錕著卽交刑部審訊其先後稟出之頭等護衛德泰包衣參領鳳昌已革護軍校德凌阿太監王衍慶均著聽候傳質○諭前因疊次有人奏參金安清濫捐婪賄各節當經諭令會

國藩查明嚴參嗣因會國藩覆奏金安清各款皆實復經降旨將該員先行革職並令吳棠將該革員解赴袁甲三軍營覈算款項茲據吳棠奏金安清勒派病民恣睢狡猾眾口一詞無不切齒該署漕督已派員將金安清押赴袁甲三軍營著袁甲三督飭委員認真覈算以重帑項其江北捐款卽著吳棠督同王朝綸等將金安清用事之委員知府馬濬金成杜文瀾黃文涵等所交收支帳底認真覈究如查有通同浮冒等情一併嚴參懲辦所有金安清原籍寓所及上海等處財產均著查鈔備抵母任隱匿寄頓嗣後江南籌餉卽由江南糧臺道員江清驥籌辦江北籌餉卽由江北糧臺道員姚仰雲籌辦金安清添設之南北籌餉局並所派各處勸捐委員並著卽行裁撤其有著名貪劣爲害閭閻者並著吳棠訪拏究辦○諭議政王軍機大臣等前據玉明等奏盜匪白淩阿

竄擾義州當經諭令該將軍派協領恩合帶兵剿辦並諭景綸春佑派兵協剿其蒙古各王旗並令理藩院傳諭令其一體助剿茲據玉明等奏協領穆錦等擊剿情形並已遵派恩合督兵追捕並據特普欽等奏匪徒越境滋擾派兵剿擊各一摺東三省爲根本重地豈容匪徒肆行竄擾盜匪白凌阿等人數無多玉明等派兵剿辦數旬以來未能蕆事總由不肯認真辦理殊爲可恨見在該將軍等已令恩合督率前派各員跟蹤追剿著卽實力窮追務將匪首白凌阿及其餘黨與悉數殲擒毋許一名漏網若敢再事遷延則是該將軍等自取咎戾朕亦何能寬貸並著景綸春佑遵照前旨各派官兵協同搜捕不准各分畛域稍有推諉儻至闌入吉林熱河境內亦惟該將軍等是問呼蘭賊匪膽敢車載槍礮乘閒劫掠雖經官軍擊斃多名而該匪逃竄入山豈容令其久延殘喘

久聞景綸等派出官兵與賊避道而行以致匪眾肆無忌憚至此著該將軍等嚴飭帶兵各員身先士卒或酌量添派勁兵分投搜勦務絕根株毋貽後患其各該省毗連蒙古各王旗著該將軍等隨時咨令扼截兜擊以免此擎被竄將此由五百里各諭令知之○諭薛煥奏江浙兩省逆匪糾眾數十萬併力東趨竄陷奉賢南匯川沙三廳縣寶山吳淞口情形喫重松江上海危急萬分見在趕催兵勇赴援等語逆匪李秀城悉眾東趨勢甚猖獗上海一隅兵力不厚豈能當此大敵著會國藩飛催會國荃將所募湘勇畱防安慶剋日督帶老勇八千救援上海擇要堵剿儻會國荃尙無實在消息卽著該大臣另派勁兵前往援應該撫又稱已飭副將滕嗣林赴湘募勇一萬餘人限於十二月內到滬至今到者甫數百人滕嗣林亦未知見在何處並著該大臣就近嚴催無論已募

若干人先行赴滬助剿毋得藉口人數未齊稽延時日其李鴻章所帶兵勇已抵何處未據該大臣奏報昨以江北鎮江軍情並緊急令該大臣催令迅即起程諒可即日到鎮並著再行嚴催該道到鎮後飭令相機由閒道進攻擣賊之虛攻其必救固當兼顧鎮城亦當籌分上海松江等處賊勢蘇常淪陷以後上海係南北糧臺餉源所出著即迅速保護見在賊勢趨重蘇省浙省各屬空虛必有機會可乘著左宗棠趕緊進兵牽制賊勢迅圖規復湖州一府四面皆賊經道員趙景賢督團固守賴以保全實屬義勇可嘉惟該郡地方緊要必須力策萬全著曾國藩左宗棠催令鮑超一軍迅攻甯國甯國既克便可由廣德打通湖州一綫之路方能聲勢聯絡左宗棠前保之劉培元並著催令迅速前赴衢州責令力籌衢州一路防剿將此由六百里加緊各諭令知之○諭前因甯波

鎮海失守經都興阿調派總兵鞠耀乾赴吳淞口扼剿諭令該將軍等體察該處緩急如須續調師船以厚兵力卽著速爲派撥茲據薛煥奏南橋等處之賊分爲三股竄撲奉賢南匯川沙三廳縣相繼失守松江上海危急萬分前由都興阿等派出之總兵鞠耀乾督帶大船等艇十一號迄今尙未到防等語鞠耀乾水師早經該將軍等派撥何以至今未到吳淞口爲江海關鍵設有疏虞松江上海皆不可保著都興阿黃彬迅飭鞠耀乾趕緊起程速赴吳淞口駐泊扼堵並著添派得力礮船前往援救以期力保完善之區松滬爲餉源所出全局攸關該將軍等務當設法保全若再因循遲滯貽誤事機恐該將軍等不能當此重咎也將此由六百里加緊諭令知之○諭前據慶端等奏浙江軍情喫緊添調水師兵丁五百名添募壯勇一千名派令副將吳鴻源統帶航海馳赴紹

興府屬之曹娥剡江而守見在甯紹杭城相繼失陷賊勢東趨上海上海兵勇不過三四萬人派防各要隘已覺兵分力絀值此大敵當前情形危急非厚集援師不足以維大局吳鴻源計已航海馳抵曹娥江著慶端瑞璜卽飭該副將由海道迅赴上海併力防剿以期掃除逆燄保衛滬城此外如有可撥師船兵勇並著慶端等酌量續派前往毋得稍分畛域致誤事機並著該督飭催李元度等迅由壽昌一路攻取杭城等處以牽賊勢廣東水師礮船素稱得力見在該省地方漸就安靖著勞崇光耆齡迅速調撥師船派委得力將弁統帶星速由海道赴援上海以利攻剿毋許稍有遲延致滋貽誤所有糧餉火藥均各寬爲籌備毋誤師行到滬以後各兵勇均歸薛煥調遣以資統率將此由六百里加緊各諭令知之○諭前據薛煥奏浙江紳士呈請借英法官兵剿賊當經諭

令該撫酌量辦理茲據薛煥奏賊撲吳淞口經法國輪船協同水師擊退請飭總理衙門與英法駐京使臣將借師會剿商定俾洋人益形鼓舞等語賊匪悉數東竄上海情形實屬萬分危急上海城守事宜業經薛煥籌辦其松江等城應如何竭力嚴防藉資犄角並就見有兵力相機迎剿以遏賊燄之處均著薛煥悉心辦理至借師助剿一節業諭總理衙門與英法駐京使臣商酌上海爲通商要地自宜中外同爲保衛軍務至緊若必俟總理衙門在京商酌轉至稽遲卽著薛煥會同前次呈請各紳士與英法兩國迅速籌商剋日辦理但於剿賊有裨朕必不爲遙制其事後如有必須酬謝之說亦可酌量定議以資聯絡趙景賢固守湖郡實屬忠勇異常見已加賞布政使銜用示優獎著卽將此旨錄寄薛煥傳示該員前會有旨令該員速赴新任諒一時亦難起程見已催令

左宗棠迅速進兵並諭曾國藩嚴催鮑超力攻甯國取道廣德援湖卽著薛煥傳諭趙景賢悉力防剿以待援師其銀米火藥油燭等項該撫務須源源接濟勿任匱乏再奉賢等城文武下落及南橋潰退將弁均著薛煥查明參奏該撫自請議處並著俟奏到時再降諭旨將此由六百里加緊諭令知之○甲午諭議政王軍機大臣等田在田奏生擒匪首劉平等及其家屬黨與盡數殲戮徐境東北一律肅清一摺東竄擒匪雖經遊擊楊文全等截剿回巢惟餘匪仍在宿城附近及蒙村等處往來滋擾西路竄賊已至豐縣徐郡東北三面喫重著田在田督飭各營將弁會同知府汪堯辰等乘此聲威將敗逃餘匪節節搜剿並將宿城附近各賊圩迅速掃蕩務絕根株勿畱餘孽將此由六百里諭令知之○諭賈臻奏逆匪圍攻潁郡郡城被圍兼旬兵力甚疲急盼援師等語潁郡

爲淮西要區見在被圍日久情形危迫勝保前統所部於初八日起程兵眾不下萬餘加以劉占考降眾不爲不厚若能兼程前進不過數日可到該大臣素以勇敢自命諒必急於援穎著卽督率所部力解城圍斷不可稍有逗遛致滋貽誤其河南兵勇布置情形鄭元善等自能妥籌辦理不必因此牽掣以致穎郡有失李續宜調任皖撫諒已起程除蔣凝學多隆阿入皖各軍由該撫分別迅商進攻外如有可撥之兵卽派得力將弁統帶赴穎壽一帶與勝保和衷商辦仍由該撫酌量調度以期悉協機宜勝保亦當虛心商酌不可以統帥自居稍涉驕矜致失士心勝保未到以前賈臻卽就見有兵勇竭力固守不許稍涉鬆懈正在寄諭閒復據賈臻奏環城賊營日偪日近更番攻撲日夜不休分守四關之兵疲憊已甚糧臺告罄火藥鉛丸存儲無多若援兵日久不到眾心自

危內變將起等語所奏自係實在情形著勝保無論行抵何處卽行兼程前進以解城圍並著李續宜迅卽酌調霍六防兵渡淮而北互爲馳援毋致坐失事機致干罪戾將此由六百里加緊各諭令知之○諭賈臻奏傳聞上年十二月間僧格林沁大軍進至曹縣考城一帶其西凌阿前隊已抵睢州甯陵該處距潁非遙請飭酌撥一旅之師赴潁援剿等語潁州被圍甚急據稱該大臣若徑趨蒙亳則圍城捻匪必將回顧老巢是捻匪去而粵逆之勢孤潁州之圍自無難立解惟前據僧格林沁奏因劉雙印復萌故智該大臣駐紮單縣濟甯較爲空虛已令西凌阿由曹縣前往濟甯駐紮該大臣見在防剿北路正當喫緊之際能否撥兵前往潁州及徑趨蒙亳之處卽著相度機宜妥爲策畫茲又據賈臻加緊奏報城圍日緊待援急迫該大臣已近單宋前隊如能迅援潁郡卽行

策應方爲妥善再前據該大臣奏德楞額會同田在田呈報克復
汴塘不實不盡已諭令該大臣查明具奏茲據田在田奏匪首劉
平已於本月初三日就擒正法其家屬死黨無一漏網等語並著
僧格林沁一併查明據實具奏將此由六百里諭令知之○諭嚴
樹森奏河南東路有警仍將省防兵勇畱駐並飭總兵穆正春赴
楚等摺片據稱毫捻劉二老淵等復有裝旗聚眾分路出竄之信
宋防情形喫重僧格林沁前敵馬隊已抵單宋之交恐該匪乘虛
西竄各等語毫捻屢經出擾宜防伺隙西竄省垣急須厚集兵力
以備不虞穆正春在豫正資得力嚴樹森所請飭令帶領親軍五
百人馬隊五十騎隨往湖北之處殊於豫省軍務非宜穆正春如
已起程著卽飭令折回河南仍率所部交鄭元善調遣其游擊李
世玉都司王國良周兆常三員及所帶馬步親兵均著一併折回

嚴樹森赴鄂需員見在周鳳山所招湘勇成軍正當由鄂北行著卽毋庸赴豫畱於湖北歸嚴樹森調遣鄭元善接任豫撫務將嚴樹森布置一切妥爲辦理豫省軍情該撫責無旁貸不得以勝保帶兵由豫赴潁藉詞推諉並著催提余際昌新募楚勇迅速整隊赴豫取道信陽疏通驛路將正羅確信一帶土匪會合張曜所部兵勇節節埽蕩卽日又據毛昶熙奏籌畫歸陳軍務及懇請單銜奏事各片所稱歸陳勢難兼顧應令穆正春統帶所部進紮陳州並令鄭元善添募勁旅親統前往汝光剿匪等語恐於省防不甚相宜殊非強幹弱枝之義省防畱駐之兵若僅楊飛熊一軍二千餘人一經賊氛竄逼又恐戰守俱困致賊肆其竄擾著毛昶熙會同鄭元善悉心妥籌毋致顧此失彼毫捻爲患甚鉅毛昶熙自請獨當其任諒非徒託空言本日又經寄諭僧格林沁酌量派撥兵

勇節節進勦惟北路藩籬尤關緊要僧格林沁兵力亦非甚厚恐其未能多撥仍著該學士就所部各軍嚴密防堵毋令蔓延並督飭項城所駐都司王永慶等營實力守禦河北團練卽應由該學士知照段晴川會同該地方官妥爲整理軍情緊要如有會商不及之處毛昶熙著准其單銜奏報以免遲延將此由六百里各諭令知之○乙未調聯康爲盛京兵部侍郎以阜保爲兵部右侍郎

由內閣學士遷

○丙申諭內閣前任都察院左副都御史張芾御史

陳廷經裴德俊先後奏參陝甘總督樂斌各款諭令麟魁沈兆霖前往查辦茲據奏稱查閱樂斌所奏辦理撤回勦撫事宜與該省士庶呈詞兵弁口供均不相符並鈔錄西甯碾伯兩縣士民控告撤回荼毒官兵總未勦辦各詞呈覽樂斌身任封疆大吏縱匪殃民捏報冒功已據麟魁等查訊得實殊堪痛恨著先行解任仍交

麟魁沈兆霖並其餘被參納賄營私各款一併徹底根究務期水落石出以成信讞而儆官邪○諭薛煥奏逆匪自竄陷奉賢等處後直撲吳淞鎮復擾及東西擺渡官軍奮力攻擊該處適當法國輪船駐泊並陸岸建有礮臺水陸開礮相助斃賊無算其上海城垣亦經會同英法文武各員挖壕築牆籌商防剿英法兩國自換和約後彼此均以誠信相孚此次幫同剿賊尤見真心和好仍著薛煥督飭官軍認真防剿力掃賊氛嗣後英法文武各員續有協同助剿之處均著薛煥隨時迅速馳奏不得沒其勞勩以彰中外和好同心協助之意○諭議政王軍機大臣等會國藩左宗棠李續宜等均負時望卓著戰功疊經先後簡任督撫畀以重任曾國藩節制四省左宗棠雖簡任浙撫並諭以不必爲地方職守牽制復因皖事孔亟不得已以李續宜移調皖撫原冀合力通籌力擬

東南大局見在江浙賊氛恣肆亟應設法進兵早圖恢復拯生民於水火前經會國藩等奏稱克復曹鎮無爲方冀東征之師可以直下江南乃自去冬以來該督撫等奏報甚稀幾於月僅一至而浙省嚴州紹興甯波杭州等府縣各城疊次報陷蘇省松江上海吳淞口等處警報頻來皖北則苗練與髮逆交乘圍潁甚急賊氛到處蔓延日甚一日朕以冲齡嗣位荷蒙兩宮皇太后孜孜求治舉賢任能焦勞宵旰日與議政王軍機大臣籌商軍務每於該大臣等奏報到時詳加披覽一切規畫輒深嘉許言聽計從想該大臣等勝算老謀於大局必早有布置惟賊氛日熾而該大臣等章奏寥寥南服倦懷殊深廑念見在會國荃募勇是否到營李鴻章帶兵是否到鎮鮑超進規甯國能否得手多隆阿蔣凝學等軍會否分攻廬壽楊載福何時可以銷假回營與彭玉麟並圖東下

兵貴神速東南之民待救孔亟而軍情變幻靡常總宜趕緊辦理其如何通籌全局緩急兼權均著將一切機宜隨時馳奏以紓懸系潁郡關北路之防湖州府海甯州前據該大臣奏稱尙能堅守上海爲餉源所自出吳淞口守禦尤要會國藩左宗棠李續宜等如何布置籌畫萬全之處均著隨時分別迅速馳奏毋再稽延實深殷盼將此由六百里加緊各諭令知之○諭田興恕奏總兵勦辦甕安各匪見在圍攻玉華山情形一摺貴州甕安匪徒盤踞玉華尙大坪兩山經總兵沈宏富督率參將劉祖成等先後將花山白巖賊巢攻克乘勝追至玉華山下督兵圍剿其尙大坪股匪田興恕分飭總兵楊巖寶等由高司坪山進攻計匪勢業已窮蹙不難將玉華尙大坪積年巨寇悉數殲除惟麻哈都勻等州縣尙被賊踞急應迅圖克復田興恕辦黔省各匪是其專責著卽統帶

各營兵勇星速出省相機進剿該大臣威望素著所向有功於該省賊匪足資剿辦江蘇浙江刻下軍情萬緊左宗棠所調之沈宏富一員必須移緩就急催令迅速起程該大臣素顧大局定不存畛域之見另片奏總兵劉義方營私取巧等情業經降旨將劉義方暫行革職至所請嗣後不知奮勉將該總兵卽行正法之處前因該大臣奏參副將彭廷勝一案已諭令詳加辦理毋致人心不服此後遇有鎮將大員干犯軍律者仍著先行具奏請旨至偏裨將備如查明所犯情罪實係違犯軍令貽誤事機者亦准其以軍法從事以重事權將此由六百里諭令知之○諭麟魁沈兆霖奏查辦樂斌參款微有端倪並撤回滋事情形將士庶呈詞鈔錄呈覽一摺撤回滋擾西甯碾伯二邑樂斌多慧不能認真剿辦派出官兵疊經挫衄乃率行議撫以致兇燄益張至巴燕戎格飽掠而

歸詳閱該二縣士庶呈詞小民慘罹焚殺眾口鳴冤其爲縱寇殃民已可概見見在撤回出沒無常浸成鉅患誠爲第一要務著麟魁沈兆霖督同該省文武各官妥爲辦理毋再含胡了事致令滋蔓難圖其樂斌多慧所擬善後章程各條既有可採卽著將應否變通增改之處悉心酌定妥議章程具奏見據多慧奏酌議嚴禁越卡私販籌擬邊防要務七條著麟魁等一併妥議具奏原摺單均著鈔給閱看其樂斌被參營私納賄各款並著悉心研鞫審明定擬具奏將此由四百里諭令知之○諭特普欽那敷德奏俄人越界割草請將辦理草率之總管革職一摺據稱呼倫貝爾與俄人接壤邊卡最多該總管珠勒格訥並不加意防範致令俄人越界偷割羊草或二三百堆至五七百堆不等並有偷挖地窖等事經特普欽等派員前往理論始據俄人承認偷割願將各處羊草

搬取淨盡並將地窖平毀等語該總管疏於防範已屬咎無可辭
迨與該國按約商辦又復任令將羊草搬回並不令其毀棄辦理
尤爲草率呼倫貝爾副都統銜總管珠勒格訥著卽革職以示懲
儆該將軍等辦理此事防微杜漸尙屬認真嗣後各處邊卡事宜
務當督飭在事員弁隨時嚴密防範庶足消患未萌至該城各營
官弁尤宜勤加訓練以資捍衛毋得視爲具文珠勒格訥所出總
管員缺關係緊要並著特普欽等秉公遴選擇其精明幹練並熟
悉外國情形者酌保前來候旨簡放將此諭令知之○命麟魁暫
署陝甘總督○予貴州陣亡副將左三發祭葬世職○丁酉諭內
閣前因綿性奏請改徵回賦奉 旨令常清等查明有無流弊復
因綿性奏常清英蘊意存回護等情派令景廉馳赴阿克蘇查辦
旋據常清等奏綿性於改徵回賦任意妄爲當將綿性先行交部

議處仍聽候景廉查辦章京國燭等暫行革職歸案嚴訊茲據景廉奏查明回賦業已徵收實屬窒礙據實奏參一招前任阿克蘇辦事大臣綿性因該城阿奇木衙門向有徵收私賦輒聽信國燭慫恿請改爲辦公之用不候諭旨先行出示辦理以致回眾驚疑幾釀巨案並將賽里木拜城定例採買銅斤擅自變更復將獲咎之愛瑪特奏畱幫辦實屬任性妄爲其奏參常清等有意阻撓煽惑回眾亦未能指出實據顯係意圖反噬尤失大臣之體著卽革職以示懲儆暫革糧餉章京國燭於改徵回賦率憑臆見慫恿綿性變更舊章其清查回戶時復敢恃強偏勒實屬膽大藐法業經另案革職發往黑龍江充當苦差應得罪名著勿庸議同子郡王愛瑪特久失回眾之心屢次獲咎迫國燭與商改徵回賦復圖分潤著卽解回庫車交辦事大臣嚴加管束毋許出外滋事至改徵

私賦久干例禁卽著通諭各城大臣將道光六年善後案內欽奉諭旨及此次諭旨譯成回字榜示通衢嗣後各城大臣及大小伯克務各潔己奉公毋許再有攤徵以恤回戶○諭議政王軍機大臣等有人奏捻匪肆逆窺伺山陝山西巡撫英桂陝西巡撫瑛棨先後曾任河南巡撫勦辦捻匪毫無成效深恐威望旣損再三貽誤請另簡兼有才望之大員委任等語捻蹤出沒靡常山東河南疊遭蹂躪見雖大加兵力一時殊難蕝事山陝完善之區地方富厚久爲逆匪垂涎儻或不能堵禦爲患何可勝言英桂瑛棨先後曾任河南巡撫勦辦捻匪迄無成效轉益蔓延今又調任秦晉各撫地屬膏腴久爲賊所覬覦而該撫等威望不足以副之原奏各情良非過慮惟該撫等受皇考知遇之恩簡任封圻有年朕亦豈肯遽予罷斥英桂瑛棨惟當振刷精神力圖報稱於各該省

防堵事宜實心講求遴選員弁分赴各要隘認真防守毋令匪徒
闌入方爲不負委任陝西兵尙可用訓練不容稍緩山西兵素不
得力英桂惟當簡練整頓力求自強豈可苟安姑待儻陽奉陰違
或委用非人視防堵爲奉行故事一經賊氛擾及毫無布置任賊
縱橫旁竄朕惟知執法從事非僅予罷斥所能了事也懷之將此
由四百里各諭令知之○諭據毓科奏籌辦救浙請飭慶端進駐
衢州並據慶端奏通籌浙省情形擬分兵三路進攻各等語浙省
徧地賊氛必應厚集精銳分投進剿慶端見議分兵三路一由溫
台直擣甯紹一由處州直擣金蘭一由衢州直擣嚴杭但能攻拔
一城則全局自振所籌尙合機宜著卽飭李元度林文察秦如虎
等各統兵勇實力進剿左宗棠應已由廣信進駐衢州慶端由建
甯進紮浦城地處建甌且可與左宗棠互相援應於閩省亦尙可

兼顧似亦妥協其應否入浙駐紮衢州著卽會同左宗棠和衷商辦毋失機宜湖郡賊氛環伺左宗棠慶端必須酌量先分一旅之師與趙景賢聯絡聲勢方不至孤城坐困匪首王瑞改名汪瑞投入粵逆糾集匪艇犯閩無非爲牽掣閩兵赴浙之計慶端已派總兵曾玉明赴五虎口扼堵並令署按察使劉翊宸等會商布置其福甯等處海口亦已派令道員曾憲德等籌辦防堵著卽知照瑞璣就近調度無涉鬆懈該督仍當以浙事爲重與左宗棠迅速規復各城不得以該匪聲稱犯閩爲所牽掣至副將吳鴻源據稱見駐五虎海口此時上海情形危急非得水師援救深恐有失該督旣飭曾玉明回閩所有吳鴻源一軍可否抽調援滬抑或另調得力師船駛赴吳淞救援淞滬卽著慶端斟酌速辦毋得稍存畛域之見將此由六百里加緊各諭令知之○諭嚴樹森奏請撤防河

勇丁並段晴川未能接辦防務一摺據稱聯捷由大名帶赴豫省防河兵勇類皆游手好閒不明紀律段晴川向未統率將與兵兩不相習不惟難資得力且恐別滋事端該員又因母老多病未能遠離懇辭防務等語此項防河勇丁卽著鄭元善派員帶赴遮克敦布王榕吉軍營酌量去留段晴川旣因母病未能遠離所有防河事務毋庸令其勉強接辦河北如有警報該員仍當號召鄉團協助官軍守禦鄭元善身任豫撫防河事務是其專責此後沿河有警卽著鄭元善由省派兵迅速防河毋令匪蹤搶渡致河北地方復遭蹂躪並須先事布置方爲妥善記名總兵穆正春在豫省諸將中最爲出色著鄭元善妥爲駕馭結以恩信俾該員知感知畏庶幾調遣可資得力將此由六百里諭令知之○諭據出興知奏石逆由永順府一帶逃竄趨蜀改撥援楚官兵赴川黔交界

方合力截剿一摺石逆由粵竄楚經江忠義分投截剿遂由瀘溪
出洞河向乾州保靖永順一路竄逸其爲假道入蜀已無疑義該
大臣已飛檄候補參將朱淩漢等援楚官兵撤赴川黔交界之思
渠龔灘等處迎頭截擊洵能不分畛域洞燭幾先深堪嘉尙石逆
垂涎川省已非一日見旣由永順一帶逃竄趨蜀必由酉秀黔江
等處西竄重慶著駱秉章卽飭川東鎮道督率兵勇會合朱淩漢
一軍嚴密堵剿如兵力不敷分布卽著添調勁兵或咨商田興恕
調派兵勇會合兜擊務令該逆不得闌入川疆方爲妥善江忠義
一軍已出永順之王村司扼截著毛鴻賓咨令迅圖進取相機剿
擊以固楚省邊防並扼該逆入川之路合三省兵力聚而殲旃剪
除巨憝在此一舉萬勿稍有疏懈護總兵成應洪一軍赴楚追剿
距賊甚遠見在楚省兵力漸厚著田興恕卽飭令撤回古州分期

苗教各匪以靖邊隅將此由六百里各諭令知之○諭景廉奏訪查阿克蘇回民苦累各情請嚴剔弊端等語據稱阿克蘇採買銅斤每斤領價八十文由糧餉局發錢四十餘文其餘概向回眾攤派並據拜城阿奇木伯克哈色木亦有攤派回戶措辦駝價之語至該處遇有過往官員豫備羊麪該伯克等藉端需索不啻倍蓰請查明禁止一併裁革又該處於道光八年查出流寓十年以外安集延四百七十三戶自置地三千餘畝近來窮苦回眾往往將地私典與安集延或安集延私自開墾匿不升科應請酌定限制一併嚴禁等情阿克蘇地處極邊似此攤派需索回眾何以聊生且回莊與外夷私行交產恐該夷等意存蠶食不獨回眾生計有礙且於邊疆大局關係非輕著英蘊會同奎棟悉心訪察嚴剔弊端以期安輯回眾綏靖邊陲原片著鈔給閱看將此各諭令知之

○賊陷浙江玉環廳城旋復之○以李元度暫署浙江布政使

由福建

署張銓慶暫署浙江按察使

由福建知府署

○戊戌諭議政王軍機大

臣等據馮子材等奏金陵等處逆賊分撲鎮城連擊獲勝一摺鎮江爲南北咽喉賊眾必爭之地該逆自攻陷杭城後金陵逆匪卽於十二月三十日派賊三四千名併入華村賊營正月初三日逆首偽普王糾合蘇杭大股並會合偽兒王力撲鎮江官軍併力擊退復於三更後攜帶雲梯銜枚襲攻次日夜閒復由丹徒奔撲北門圍攻城外營盤分股直撲東南兩門均經官軍擊退是其兇悍情形極爲可慮雖經馮子材等設法固守第賊眾兵單設該逆仍更番來犯其勢恐不能支會國藩前奏令道員李鴻章帶水師五千名陸軍六七千名前赴鎮江業已疊次催令迅往若不派此勁旅分道進攻丹陽等處以戰爲守則賊眾閒暇必將併力鎮城設

有疏虞非獨揚防喫緊卽江南亦無駐足之處著曾國藩迅飭李鴻章馳往鎮江相機攻剿毋得再有遷延致誤大局都興阿前已派副將刁經明等帶兵前往援救見在天六等城次第克復揚防兵勇如有可以抽撥者仍著酌量派往馮子材等務當督飭將士攻守兼施不可稍涉鬆懈以保名城再據吳棠奏捻竄沭陽恐其東竄阜甯鹽城等語裏下河爲江北完善之區該捻久已垂涎吳棠甫經到任兵勇無多恐難抵禦著都興阿察看情形妥籌兼顧毋稍大意將此由六百里加緊各諭令知之○諭吳棠奏捻匪自徐境東竄沭陽縣境請飭僧格林沁迅撥馬隊追剿等語捻首李城等糾合各股匪徒由沭塘迤東併股北竄白嶧縣頓莊牯搶渡運河旋由紅花埠劉馬莊竄至沭陽之馬蹏莊湯家澗等處經吳棠調派副將袁世功等督帶馬隊前往沭陽迎剿獲勝獲賊訊供

此次捻逆出竄約三萬餘人欲東竄阜甯鹽城打糧見在大股捻蹤仍在沐陽盤踞鹽城阜甯一帶尙屬完善亟須厚集兵力痛加勦洗以裕江北餉源僧格林沁所部各軍聲威素著該匪聞風震懾見已督師追賊至單縣地方距徐屬碭山僅百餘里著卽酌量迅派馬隊二三千名兼程前赴沐陽會同吳棠派出兵勇合力兜剿俾該匪急於回顧不敢東竄並不至乘隙北犯則剿辦自易得手僧格林沁務須統籌全局南北兼顧是爲至要清淮兵力較單見據吳棠咨催龔耀倫赴任並檄調張祖雲等帶隊來援著田在田卽飭各該員剋日起程迅赴沐陽會剿毋稍遲誤清江防守事宜吳棠業經趕築圩牆並派調步隊齊集練丁協同扼守布置尙屬周妥仍著嚴密防範不可稍涉大意又吳棠片奏徐臺萬分支紕截留清淮軍需銀一千八百兩又提撥藩庫銀三千兩解赴徐

郡以資接濟徐州軍餉已可支持田在田惟當激勵將士將徐宿一帶賊圩次第攻克毋稍稽延將此由六百里加緊各諭令知之○官軍復山東莘縣城○己亥諭內閣協辦大學士兵部尙書麟魁品學端方老成練達由翰林院洊擢正卿懋受三朝知遇上年冬閒派往甘肅查辦事件本年復簡授協辦大學士倚畀方殷茲聞其於蘭州差次因病出缺披覽遺章拳拳國事並知其途感受風寒不遑休息到蘭數日遽爾溘逝洵屬沒於王事痛惜良深麟魁著加恩照大學士例賜卹任內一切處分悉予開復應得卹典該衙門察例具奏其靈柩回京著沿途地方官妥爲照料並准其人城治喪伊子候選員外郎恩壽著賞給舉人准其一體會試用示篤念盡臣至意尋予祭葬諡文端○袁甲三李世忠奏官軍自攻克天六後江浦縣城僅西北門外紮有賊營臣李世忠督

率各隊於正月初二初三等日將北門外賊營踏毀連夜合圍並令黃承恩龔銓潛赴西門外求雨山賊壘相機招撫守賊劉元城單玉功均願投誠內應初四日臣李世忠親督將弁分攻四門城上礮石紛落我軍驟難得手忽見城上火起內應舉發總兵王茂先等帶隊齊進城內之賊開門出戰我軍分投迎敵劉元城等各帶降眾倒戈相向僞報王秦逆猶領悍賊巷戰臣李世忠繞至賊後令兵勇開槍轟擊秦逆爲亂軍所殲城賊搜殺殆盡內有僞王宗操天福李長旺等賊目七十餘名江浦縣城卽於初四日克復是日浦口九洲洲援賊徑撲東南兩門我軍更番出戰賊卽敗退臣李世忠激勵將弁乘勢進攻初五日齊抵浦口城下該逆負隅不出九洲洲老巢三四千人麤集來援臣李世忠親督官軍奮勇衝擊賊向東北二門逃竄城賊開門援應我軍豫伏濠邊乘勢搶

偏遊擊宋林等首先入城李元忠等帶隊繼進斃賊一千餘名生擒三百餘名內有僞效天安林瑞汶等四十餘名浦口卽於是日克復餘賊竄至江邊我軍追擊淹斃無算臣等查江浦浦口爲江北最要門戶自被該逆竄踞官軍屢攻未下以致揚防喫重六合天長儀徵一帶悉遭蹂躪江南大營受其牽掣幸賴皇上天威將士用命乘勝進取連拔兩城俾金陵之賊聞風喪膽實爲臣等始願所不及再江浦浦口必須重兵扼守從此力埽九洲賊氛廓清北岸方可進圖金陵臣李世忠止此兵力未能分守見在揚防之兵足敷抽撥應請旨飭下都興阿遴派得力將領統帶大隊迅赴江浦浦口紮營防守並爲進剿九洲洲之計見探和含逆賊竄至全椒聲言圍攻滁全六合臣李世忠擬卽派隊回滁嚴密防剿上諭袁甲三李世忠奏克復江浦浦口一摺袁甲三調度有

方著交部議敘李世忠親督將弁連拔兩城使金陵之賊聞風喪膽深堪嘉尙著交部從優議敘卽著將江浦城南一帶賊營乘勢一律掃蕩所有在事出力員弁勇丁著袁甲三等擇尤保奏候朕施恩○諭議政王軍機大臣等據袁甲三奏前於克復六合時據投誠之黃朝棟稟稱張落荆西竄係陳逆所使並令逆首馬代帶二千六百人會合張苗二逆爲到處攻城之用洪逆並允給苗浦霖銀十萬兩洋縐洋布各二萬匹見在克復江浦見貼有洪逆僞示稱張苗兩股一由上游竄入河南再犯湖北一由下游徑撲清淮扼踞蔣壩之說請飭嚴防等語皖北逆匪經楚軍節次剿敗勢已窮蹙而陳逆素稱狡譎其句結張苗二逆乘虛分擾亦屬意慮中所有之事前據賈臻奏稱逆匪攻圍潁郡甚急是其分股西竄已有明徵若復再犯楚豫則受賊牽掣不如先發制人較有把握

著官文嚴樹森鄭元善各撥勁旅迎頭截擊儻該逆尙未竄入楚豫卽飭進解潁州城圍力杜紛竄以保完善之區見在天六等處業已克復雖不慮其扼踞蔣壩而清淮門戶不可不嚴加防範並著吳棠添兵堵剿毋使竄越袁甲三另片奏江浦克復提督李世忠曾許犒賞銀二萬兩請由江北糧臺撥解並稱已革運司金安清前於皖省捐局擅用薪水錢二萬三千九百餘串該革員見在泰州開設銀號數處請飭吳棠勒令如數呈繳各等語江浦爲江北要區見在旣經克復則犒賞自不可少卽著吳棠於江北先行如數籌撥交袁甲三轉給犒賞其金安清應繳之款吳棠卽勒令呈繳撥歸江北糧臺以清款項該革員泰州開設之銀號數處並著吳棠查明如非與別姓合夥並與地方無礙卽迅速嚴密查鈔浙江候補道汪曜奎前與金安清同辦捐務諸多牽涉該道前以

所解餉票不符繳還部照亦多短缺經袁甲三奏參勒令赴皖見
在金安清已解赴袁甲三軍營而汪曜奎若不到案必致任意狡
賴該道籍隸蘇州其見避何處金安清必能指出卽著吳棠查明
一併提解赴皖眼同結算以昭覈實將此由六百里各諭令知之
○諭袁甲三奏攻克江浦浦口兩城並覆陳布置各路防剿情形
各摺片江浦浦口均爲江潁地方緊要關鍵見經克復必須撥兵
駐守以期力埽九洑洲賊氛廓清北岸進圖金陵李世忠之軍見
聞和含賊匪竄至全椒官渡欲攻六合全滁卽須派隊回滁防剿
兵力勢難分守著都興阿就近遴派得力將領分撥大隊迅赴江
浦浦口紮營防守並爲進剿九洑洲之計賊以全力趨浙金陵勢
必空虛下游黃彬等所帶師船亦應協力上攻九洑洲並著都興
阿酌量調遣袁甲三所奏江浦城南三十里橋林尙有賊營四座

烏江亦有賊壘卽著李世忠乘勢掃蕩以與楚師會合並著曾國藩飭催楊載福回營與彭玉麟所帶上游水師與下游水陸會合規取金陵以爲掃穴擒渠之計於東南全局轉機關緊甚要務當迅籌辦理毋或失時潁郡情形危緊李續宜身任皖撫責無旁貸總兵吉順兵勇二千餘人見駐六安或卽令其率領所部援潁或另行抽撥楚軍赴潁而以吉順之兵防守六安卽著李續宜酌辦廬郡賊援已斷梁園店埠機有可乘仍著袁甲三飭令都司褚開泰乘機進剿並將廬郡雙墩集敗匪速飭副將徐鵠探蹤堵擊其蔣凝學與多隆阿等分攻廬壽之兵亦著李續宜飭催進取將此由六百里加緊各諭令知之○諭鄭元善奏稱潁郡已成坐困陳郡又無重兵各匪不免乘虛西竄見在抽撥省防馬步兵勇派副將楊飛熊馳赴沈項交界之槐店集扼要駐紮並將沈項見有防

兵統歸該副將調遣兼與潁西各堡寨聯絡聲勢所籌尙屬周密
惟潁郡被圍甚緊疊經諭令勝保李續宜督兵赴援到潁尙需時
日數日以來賈臻並無報到深恐城圍已合不及救援萬一潁郡
有失則陳郡各屬防堵更難措手著鄭元善體察情形如沈項尙
不十分喫緊卽飛飭楊飛熊督率各軍前赴潁州力解城圍以鞫
爲防較之株守一隅靜待賊來者功效奚啻倍蓰該撫務當不分
畛域相機籌辦將此由六百里諭令知之○調愛仁爲兵部尙書
以倭仁爲工部尙書文祥爲左都御史由戶部左侍郎遷○以沈兆霖暫
署陝甘總督由戶部尙書署○庚子諭盛京直隸山東各將軍督撫嚴查
海口○轉寶璽爲戶部左侍郎以熙麟爲戶部右侍郎由內閣學士遷○
前任工部尙書張祥河卒予祭葬諡溫和○辛丑諭議政王軍機
大臣等據袁甲三密陳皖省軍務深恐事權不一並苗沛霖猖獗

原委各摺片業經摘取要語未露該大臣姓名由六百里密諭勝保嚴切訓誡矣袁甲三所陳苗沛霖猖獗由前年勝保調伊帶練北上書函措詞失當所致見在楚軍主剿而勝保主撫事權不一恐誤大局亦屬實在情形苗逆久隸該大臣麾下何無潛移默化之功卽其與壽州紳練尋戮及截畱該大臣等餉銀時叛逆已著

文宗顯皇帝諭旨屢令設法剿辦該大臣總一味姑容立意主撫迨見事勢日迫始有主剿之說旣已主剿又無方略徒以兵單餉絀爲詞試問此事養癰貽患豈能獨歸之勝保而謂與該大臣毫無干涉耶勝保業已嚴切申諭如果於此事不能妥協辦理袁甲三不能竭力挽回意存諉卸勝保與袁甲三朕必一併重懲以昭公允李續宜旣以撫苗爲非卽著咨照多隆阿蔣凝學各軍分路攻剿會商袁甲三實力籌辦斷不可因勝保南下必主撫議豫

存成見致攻勦機宜稍形鬆勁如勝保所辦實有於大局掣肘之處並著袁甲三李續宜一面密行設法阻止勝保一面會同據實具奏天長投誠之陳士明據都興阿奏詹啟綸探稟係反覆無常之人恐難遽信何以仍令其扼守該邑著袁甲三不動聲色確查密奏袁甲三接奉此旨卽照錄一分密遞李續宜公同商辦將此由六百里各密諭知之○諭前因潁州城圍緊急特諭勝保統兵南下近日京中聞該大臣有南行之舉疊次有人以事權不一辦理兩歧之說紛紛陳奏據稱楚軍見在由舒六分攻廬壽皖軍連克數城淮南爲粵逆踞者除巢和含已被楚軍偏困外廬郡賊心渙散附近居民助勦者絡繹鼓舞皖撫李續宜不久可到深以撫苗爲非曾國藩彭玉麟亦均一意主勦廬郡一克則楚皖聯絡一氣併力勦苗苗患平則約會豫軍共圖捻逆直擣賊巢皖省軍務

已大有轉機特恐楚軍主勦而該大臣主撫事權不一貽誤大局各等語所奏不爲無見苗沛霖叛逆已成斷不可撫前經申諭再三想該大臣亦確有定見惟尙未將籌辦情形奏到殊深懸系朝廷用人行政雖不爲浮議所搖而公論之是非亦斷不能置之不顧況見在新政初頒如果眾論僉同之事尤當立見施行該大臣惟當仍遵前旨勦散擒逆迅解潁圍一面解散脅從一面計擒苗逆與李續宜袁甲三等和衷合力約會鄭元善共圖埽蕩淮北以清中原大患方爲不負委任儻回護前奏一意主撫又與楚軍辦理兩歧致張逆箴貽誤大局屆時彈章紛至又何能曲爲該大臣保全也又有人奏十年京城被擾勝保奏報苗沛霖北上函內有天子蒙塵百官失職禁旅蕃騎皆不足恃及勢若倒懸無奈作秦廷之哭等句苗沛霖從此生心素服郊哭又苗沛霖向人語云勝

保曾有書來屬待其來再行受撫各等語是否實有其事著勝保據實具奏將此由六百里密諭知之○諭江浙逆匪糾眾數十萬併力東趨上海情形危急該處兵眾四萬有餘無鎮將大員親督統率以致未能得力薛煥有應辦地方公事及各國通商事務不能專意防剿深恐貽誤馮子材久歷戎行樸誠勇敢朕所深知著卽前赴上海統率各軍上海爲餉源所出關繫東南大局該提督到滬後務當力加整頓以戰爲守嚴扼要隘以保危城該提督能否卽日起程並由何路繞赴卽著迅速馳奏以慰廑念鎮江軍務卽交海全會同魁玉接辦該城餉需支絀除由北岸籌餉接濟外並著薛煥另由上海寬備糧餉隨時解往毋稍遲誤將此由六百里加緊各諭令知之○諭前因有人奏福建藩司裕鐸日事荒蕪與在籍直隸州知州姚鏡圖往來狎密因而招搖射利撫臣瑞璿

老病聾聵不能治事督臣慶端意存遷就等語當諭慶端查奏茲復有人奏慶端顛預廢弛日事荒樂倚候補知府劉翊宸爲心腹納賄營私專務搜括知府胡斌派辦南臺釐局勾串軍犯陳昂卽陳先加耗浮收捏造鈐記私設局卡慶端派劉翊宸查究僅以蒙覆了事該員等朋分洋藥稅贏餘並浼慶端幕友陳耀庭引綫以俱餽獻建甯府知府張文斌冒銷釐金勒派捐項知縣張其曜於蠲免丁糧追呼鼎沸辦理崇邑團練侵蝕勇糧賊氛偏關席卷先遁見聞捐升道府在閩候補江西已革道員馮席珍帶勇援浙道過崇安知縣戴昌文導令淫掠復勒派銀米幾致激變紳民呈控慶端知其荒謬並不嚴辦該督職任兼圻坐視浙江之危漠不援救以瑞璫之昏聩益以慶端之顛預閩且可憂於浙何濟等語浙江全省被賊竄擾慶端疊奉諭旨援應始赴建甯復諭令前往浦

城尚未據該督覆奏見已明降諭旨令耆齡馳赴福建辦理援浙軍務耆齡於奉到諭旨後著卽行起程馳赴建甯卽統慶端所部兵勇接辦援浙軍務一面將慶端撤任聽候耆齡查辦如浦城較建甯扼要卽著耆齡由建甯馳往浦城會商左宗棠妥爲籌辦前據慶端奏匪首汪瑞糾集艇匪犯閩已派總兵曾玉明統帶師船扼紮五虎海口是否辦理得宜並著耆齡酌度情形妥籌防剿該撫如有久練之兵於沿途不至擾累卽著酌量帶閩調遣以資得力廣東省北江軍務尙未戡事著卽會商勞崇光於司道大員中揀派能得軍心曉暢戎事之員接辦以便該撫迅卽起程閩浙軍情至緊萬不可緩至慶端瑞璫及裕鐸等被參各款耆齡於抵閩後務須逐款訪查秉公參辦毋稍徇庇以儆官邪原奏二件均著鈔給閱看將此由六百里諭令知之○命耆齡馳往福建辦理

援浙軍務以勞崇光暫兼署廣東巡撫○壬寅諭內閣耆齡奏官軍攻破藍山各賊寨殲斃首逆地方肅清一摺廣東藍山逆匪被擊後竄踞赫巖寨等處意圖抗拒上年七月間經耆齡派令知府康國器等率勇進剿先將寨前神廟礮臺踣匪殺賊無算都司吳光亮乘勢移營進逼賊巢施放火箭寨內火起賊眾驚潰殲斃不計其數生擒逆首梁興保梁神通等百餘名訊明正法其螃腳逆巢經康國器等分路進剿斬擒無算逆首周裕率黨數百人沿途竄伏旋經紳民拏獲解赴韶州凌遲處死其藍山積年悍賊約經官軍殲擒無遺地方一律肅清在事出力人員著該督撫擇尤保奏候朕施恩○諭議政王軍機大臣等前因吳棠奏擒匪自徐境東竄沐陽當經諭令僧格林沁酌派馬隊前往會剿並諭令臣在田速飭龔耀倫等剋日赴援茲據吳棠奏前起擒股雖經袁世功

等追剿獲勝後起大股捻匪自高流等處竄至蔣家圩與前匪合股袁世功朱光庭等分督馬步各隊奮勇剿擊斃賊七八百名追壓二十餘里該捻又復蜂擁來撲並有另股捻逆繞向東南奔竄意圖鈔出官軍之後襲擾清淮等語清淮防兵單薄若不添兵助剿必致滋蔓難圖著僧格林沁仍遵前旨迅卽酌撥馬隊二三千名馳赴沐陽會同吳棠所部各軍合力剿洗並飭德楞額由台莊帶隊前往援剿毋稍遲誤龔耀倫等自徐帶來兵勇不過八百餘名仍恐不敷分剿著田在田察看徐宿軍情如見在不十分喫緊卽添派張祖雲姚廣武兩隊前來策應裏下河等處完善之區爲江北餉需所自出該匪垂涎已久亟應竭力捍禦以裕餉源著都興阿就近調派勁旅前赴阜甯一帶迎頭截擊以遏賊氛當此時艱孔急該大臣等務當統籌全局不分畛域協力剿辦將此由六

百里加緊各諭令知之○癸卯僧格林沁國瑞奏疊奉諭旨酌量撥兵前往潁州援剿或徑趨蒙亳臣僧格林沁審度機宜捻匪老巢多在亳州東南該逆若欲北來由歸德之永虞夏徐州之豐沛蕭碭直入東境或由宿徐北至韓莊入牯頭頭是道若重兵紮於亳州不能扼賊北竄我軍自去歲大彰撻伐後捻逆時有結眾北竄之信此時亟須嚴加防範該逆如果北來自當再加懲創此後辦理皖捻方可得手潁州被圍雖急若撥兵前往少則無濟於事若全軍往援恐該逆乘虛北來我軍反落賊後且前接譚廷襄來函言勝保不日取道大名赴豫自係遵旨由豫赴潁是勝保一軍南下河北已覺兵單賈臻又欲臣等統軍往南萬一該逆北竄何以禦之況東境各處匪黨尚未削平見在督飭搜捕其直東交界派遮克敦布與王榕吉駐紮防守並奉諭旨令臣僧格林沁通籌

兼顧臣等惟有先籌肅清東境疆圉嚴防皖捻以固北路藩籬一俟腹地安帖然後統軍節節前進庶免爲該逆牽掣南捻前竄豐縣業經擊退回巢此時該逆五旗並出意在竄撲東境見督馬隊駐紮單縣馬良集等處修築隄濠以遏賊蹤其曹屬會匪雖經疊次痛剿大股漸就肅清而零星賊匪伏匿河套時思出竄前派趙康侯帶領勇丁在鄆鉅迤西駐紮搜捕並飭署鄆城縣知縣陳烈等分路搜緝據趙康侯稟報將著名匪首常連佩擊獲解營訊辦其餘黃河套內零星匪黨見飭趙康侯等一俟河冰開凍再行前往剿撫又據毛昶熙文稱河南商邱縣金樓地方有另股捻匪盤踞官兵攻剿數月未能得手咨商移兵會剿臣等復探得金樓迤南十數里卽宋濬沅孫葵心老巢該處糧草缺乏若大兵前往人馬無處覓食臣僧格林沁咨行河南巡撫籌撥餉銀在虞城商邱

夏邑等縣先行置備糧草如擒逆無北竄確音即可乘閒督兵進剿至奉諭飭查田在田攻克汴塘究竟有無諱捏臣等已飭兗州鎮道確探接仗情形是否屬實尙未接據稟覆茲准吳棠函稱擒匪竄至沐陽縣境已奏請由臣等迅撥馬隊二三千名馳往追剿查上年十二月皖逆竄至魚臺沛縣經臣等派撥馬隊剿除大半該逆未遂所欲星夜竄回今復由嶧境過河東竄難保非誘我軍向東追剿該逆乘曹單空虛得以北犯是以臣等駐軍單縣並派前敵馬隊馳赴碭山馬良集等處駐紮既可嚴防擒匪北竄又可作直擣老巢之勢俾該捻抽身回顧東路賊情自緩矣臣僧格林沁見飭德楞額迅速追剿並咨行吳棠飭令該處官兵實力剿辦毋任滋蔓上諭議政王軍機大臣等僧格林沁大軍原屬不可輕動必須北路之防穩固方可進剿擒巢西凌阿之兵如果已至

宋郡切近潁州卽遵前旨調派赴援以保危城汴塘棍匪業已殲除幾盡其餘股匪據報自郟城馬頭集往撲清淮諒卽吳棠所奏游弋沐陽等匪僧格林沁所稱該逆意誘我軍向東追剿卽乘曹單空虛北犯甚爲有見見派前敵馬隊馳赴碭山之馬良集等處駐紮既可嚴防北竄又可作爲欲擣該捻老巢之勢使賊回顧以緩東路賊情並飭德楞額作速進剿與吳棠飭令該處官兵實力剿辦卽照所籌迅速辦理田在田見赴該大臣軍營稟商進剿機宜該總兵謀勇尙爲可用旣自願爲僧格林沁前驅北路官軍併歸該大臣統率與東豫諸軍相聯一氣更必可期得力抑或仍令自爲一路著僧格林沁妥籌具奏北路諸軍總宜互相策應非事權歸一不足以資調度僧格林沁素矢公忠諒必能大局通籌總期於事有濟不必意存謙抑也將此由六百里諭令知之○命兩

淮鹽運使喬松年督辦沿江團練○甲辰諭議政王軍機大臣等
前因杭州甯波等府失守沿海各口宜加防範諭令薛煥等將購
買外國船礮速籌辦理茲據總理各國事務衙門奏購買船礮銀
兩與署總稅務赫德覈計約需八十萬兩請飭該撫趕緊與赫德
商酌購買並請飭閩粵兩關分籌銀兩兩江總督撥派官兵前往
上海聽調等語逆匪於甯波海口擄掠鈞艇沿海地方均形喫緊
所有購買外國船礮未可再事因循見已由總理各國事務衙門
札飭赫德赴滬商辦並鈔錄單開船礮價值飛咨上海等口卽著
薛煥督飭該稅務司將應購船礮軍械等速爲購買其船隻務須
購覓兵船不可以貨船信船充數其駕駛輪船應否雇用呂宋等
國之人以免臨時挾制著薛煥商令赫德相機辦理至酌配兵丁
及統帶大員著會國藩於水師官兵內遴派得力鎮將並兵丁等

聽候調遣一俟船礮購齊卽行飭赴上海等處以資防剿見在北洋防務尤關緊要並著薛煥於購齊後酌分數隻駛赴天津毋許稍分畛域應需價值銀兩著勞崇光於粵海關稅項下籌銀二十萬兩文清慶端瑞琰於閩海關廈門稅項下籌銀十五萬兩以備咨取其餘銀兩卽著薛煥於江海關關稅等項下趕緊籌款應用其閩粵兩海關所籌銀兩見已令總理各國事務衙門行文各省辦理洋藥票稅俟徵有成數卽爲歸補各關之款以昭覈實事關海疆要務該督等務須協力同心迅速會同辦理不得稍存意見推諉遷延致有貽誤原摺著鈔給閱看將此由六百里加緊各諭令知之○諭本日據總理各國事務衙門奏請飭江蘇等省籌款購買外洋船礮復據片奏逆匪竄擾上海萬一情形喫緊恐江蘇勢難兼顧請卽由兩廣總督商辦等語著勞崇光探明如上海有

未能兼顧之勢或赫德已經抵粵卽由勞崇光飭令赫德趕緊妥辦其閩海廈門二關應籌銀兩卽著文清等解交勞崇光查收應用該督等接奉此旨卽當探明上海情形迅速籌辦毋許推諉如果各關餉項不敷卽著勞崇光另行籌款辦理原片並鈔給閱看將此由六百里加緊再各諭令知之○廣江西撫州府學額五名宜黃縣九名○丙午諭內閣朕奉 母后皇太后 聖母皇太后懿旨三載考績黜陟鉅典向來滿漢諸臣有能夙夜精勤勦勞懋著者特加甄敘其衰庸不職者亦必立予罷斥不能故示優容當此四方多事百廢待舉之時尤應揚清激濁以樹風聲茲因京察屆期吏部開單照例題請允宜詳審用示甄敘恭親王自簡授議政王以來首贊樞廷親賢輔翼公忠體國於一切用人行政事無鉅細綜覈靡遺著交宗人府從優議敘大學士桂良戶部尙書沈

兆霖都察院左都御史文祥戶部左侍郎寶鋆在軍機處行走實力助勦和衷共濟順天府府丞曹毓瑛自參機務克任厥職均著交部議敘大學士湖廣總督官文久任封圻虛懷延攬於吏治戎行均能整飭著交部從優議敘協辦大學士兩江總督曾國藩督軍剿賊勤勞罔懈於江皖地方疊復名城戰功卓著甄拔所部將士賢能稱職前經簡授協辦大學士仍著交部從優議敘四川總督駱秉章前在湖南巡撫任內剿辦賊匪不分畛域其所薦舉人才尤爲有裨實用自升任川督辦理丹棱股匪及整頓地方均能妥速著賞加太子少保銜用示嘉獎倉場侍郎廉兆綸辦事顚預聲名甚劣福建巡撫瑞璜老病昏庸難期振作均著勒令休致該二員各有牽涉被參之款仍均著聽候查辦餘著照舊供職○會國藩奏查浙省僅存衢州温州湖州三府及海甯州一城温州土

匪紛集恐難終保湖州海甯孤懸賊中無兵赴援亦難倖全惟衢
州一府可以圖存然欲保衢州必先守定江西廣信玉山而後有
運糧之路欲復杭省必由徽州以攻嚴州而後有進兵之路是圖
浙之道守衢與攻嚴二者不可偏廢也臣見飭兩江糧臺籌撥餉
糈軍火接濟衢軍並派員於玉山設局轉運飭李定太堅守衢防
以待援兵至進攻嚴州則專賴左宗棠一軍必先埽歙縣婺源之
零股攻克開化遂安之堅城乃能達於嚴郡目前兵力尙單難遽
深入須俟蔣益澧一軍到衢後衢嚴分路並進庶幾局勢漸緊臣
與左宗棠往返熟商所以規復浙江保全江西皖南者均在乎此
惟當竭誠合謀斷不敢稍存畛域至於節制四省之名仍懇 聖
恩收回成命臣非因浙事決裂豫存諉過之意儻左宗棠辦理無
效臣當分任其咎所以不願節制四省再三瀆陳者實因大亂未

平諸道出師將帥聯翩臣權位獨重恐開斯世爭權競勢之風兼防他日外重內輕之漸機括甚微關繫甚大區區愚忱仰祈 聖明鑒納 上諭前因江浙軍務統帥需人特降諭旨令曾國藩以欽差大臣節制江南浙江等省巡撫提鎮以重事權旋據曾國藩奏陳自受任兩江總督以後於皖則無功可敘於蘇則負疚良深並稱用兵之要貴得人和而勿尙權勢貴求實濟而勿爭虛名懇請收回成命覽奏具見惻忱深爲嘉許仍諭令節制四省以收實效茲據該大臣奏稱接奉恩諭再陳下情見在諸道出師將帥聯翩權位太重恐開斯世爭權競勢之風兼防他日外重內輕之漸懇恩仍收回成命各等語具見謙卑遜順慮遠思深得古大臣之體在曾國藩遠避權勢自應以此存心方不至啟驕矜之漸而國家優待重臣假以事權從前本有成例曾國藩曉暢戎機公忠體

國中外咸知當此江浙軍務喫緊生民塗炭我兩宮 皇太后孜孜求治南望增憂若非曾國藩之惻忱真摯亦豈能輕假事權所有江南安徽江西浙江四省巡撫提鎮以下仍悉歸曾國藩節制該大臣務當以軍務爲重力圖攻剿以拯生民於水火之中毋許再行固辭國家用人行政自有權衡各路統帥諒不敢妄行矜詡希假事權以瑣瀆陳奏上煩朝廷裁抑也將此宣示中外知之○曾國藩奏上年二月間浙江省城被陷前撫臣羅遵殿殉難欽奉諭旨照巡撫例從優賜卹時臣駐軍宿松適羅遵殿之子候選員外郎羅忠祐扶柩回籍赴臣處呈稱杭州破後羅遵殿之妻徐氏孀女陳羅氏族姪婦周氏及雇婦金梅氏家丁顧斌均同時殉節旋閱邸鈔御史高延祐奏參奉旨將羅遵殿卹典撤銷臣查浙省向來供給甯國一軍恃以堵禦門戶故省城久不設備羅遵殿到

任未及三月方思整軍選將自固邊防乃大股賊匪卽由甯國界
內竄入其咎似難獨歸於該撫及至城破身殉妻女眷屬相率就
義實堪矜憫軍興以來凡疆吏守城殉節皆得仰邀卹典獨羅遵
殿孤忠盡瘁未荷哀榮臣竊惜之該撫由進士知縣外任二十餘
年歷著循績臣駐紮宿松曾赴弔羅遵殿之家見其家無長物環
堵蕭然旣定其清操之過人復欽其臨難之不苟粵匪蹂躪各省
有守土之責者才略有短長戰守有利鈍但能以死報國卽爲克
盡人臣之道不必更爲苛刻之論伏懇 皇上查照 先皇帝初
次諭旨仍飭將羅遵殿從優議卹並將隨同殉難之妻女及家丁
等一併議卹以彰忠節至此次浙省再陷臣聞瑞昌王有齡均已
殉難與薛煥咨報相同瑞昌忠勲最著自必仰蒙恩卹惟王有齡
平昔苛派捐餉嚴劾紳士杭州之人感其死守紹興之人恨其暴

敘難保無身後之訾議應請 聖主憫念時艱表揚忠烈並將王
有齡俯賜優卹爲封疆大臣以死勤事者勸 上諭前任浙江巡
撫羅遵殿於咸豐十年二月間賊陷杭州卽時殉難當經 文宗
顯皇帝降 旨優卹嗣因御史高延祐奏參該故撫當賊匪攻城
不肯出一軍抵禦坐待省城失陷復經降 旨將卹典撤銷至伊
妻伊女應得旌典仍著照例辦理我 皇考於褒忠之典愼事之
懲一秉大公原無成見茲據會國藩奏羅遵殿以死勤事懇仍照
初次 諭旨給予優卹等語詳加覈度羅遵殿歷任官聲均好辦
事實心浙省向恃甯國一軍爲藩籬迫賊由甯國竄入浙境該故
撫到任未及三月倉卒登城布置未能周密尙屬情有可原及至
城破之日從容赴義閭門殉難大節無虧尤堪矜憫著仍遵 皇
考文宗顯皇帝初次 諭旨從優賜卹應得卹典該衙門察例具

奏請予祭葬諡壯節○會國藩奏前任安徽巡撫翁同書咸豐八年七月間梁園之挫退守定遠維時接任未久尙可推諉乃駐定一載至九年六月定遠城陷文武官紳殉難甚眾該撫獨棄城遠遁逃往壽州勢窮力絀復倚苗沛霖爲聲援屢疏保薦養癰貽患紳民忿恨遂有孫家泰與苗練仇殺之事逮苗逆圍壽則殺徐立壯孫家泰蒙時中以媚苗而並未解圍壽城旣破則合博崇武慶瑞尹善廷以通苗而藉此脫身苗沛霖攻陷城池殺戮甚慘翁同書不能殉節反具疏力保苗逆之非叛團練之有罪始則奏稱苗練入城並未殺害平民繼則奏稱壽州被害及婦女殉節者不可勝計請飭彭玉麟查明議卹已屬自相矛盾至其上年正月奏稱苗沛霖必應誅剿摺內有身爲封疆大吏當爲朝廷存體制兼爲萬古畱綱常今日不爲忠言畢生所學何事等語又云誓爲國家

守此疆域保此殘黎儼然剛正不屈字挾風霜逮九月壽州城破
翁同書具奏摺片則力表苗沛霖之忠義視正月一疏判若天淵
顛倒是非熒惑 聖聽敗壞綱紀莫此爲甚若翁同書自謂已卸
撫篆不應守城則當早自引去不當處嫌疑之地爲一城之主又
不當多殺團練以張叛苗之威若翁同書既奉諭旨責令守城則
當與民效死不當濡忍不決又不當受挾制而草奏獨死轉而偷
生事定之後翁同書寄臣三函全無引咎之辭軍興以來督撫失
守逃遁者皆獲重譴翁同書於定遠壽州兩次失守逃遁又釀成
苗逆之禍豈宜逍遙法外應請旨卽將翁同書革職拏問飭下王
大臣九卿會同刑部議罪以肅軍紀而昭炯戒 上諭前任安徽
巡撫翁同書身任專圻當此多事之秋宜如何力濟時艱勉圖報
稱咸豐九年六月閒定遠失守文武官紳殉難甚眾該撫獨棄城

遠遁逃往壽州復不能妥爲辦理致有紳練仇殺之事迨壽州城陷後奏報情形前後矛盾實屬貽誤取巧苟且偷生翁同書著卽革職拏問交王大臣九卿會同刑部秉公定擬罪名具奏袁甲三與翁同書同辦一事且有督辦軍務之責豈能辭咎著交部嚴加議處○曾國藩奏接奉諭旨以皖撫需人溫諭疇咨臣反復籌度所屬司道大員內實無素統陸軍者可勝皖撫之任查有前任雲貴總督張亮基久任封疆險阻備嘗威望素著咸豐二三年間在湖南巡撫湖廣總督任內籌辦防剿布置得宜輿論翕服湘勇赴省訓練實自張亮基發其端故楚中將弁樂爲之用該員籍隸徐州於穎亳宿蒙等處地勢民情亦甚熟習至湖北撫臣李續宜上年九月曾自行奏請回皖撫本任該員忠勇沈摯常思奮身赴義不願就易避難其所部成大吉肅慶衍蔣凝學各軍皆在皖境可

否仰懇 聖恩於張亮基李續宜二員中特簡一人爲安徽巡撫
當於大局有裨沈葆楨欽奉諭旨簡授江西巡撫計可迅速赴任
至賈臻所奏探聞廬州克復並無此事僞英王陳玉城受金陵賊
酋僞旨聞以皖北爲分地安慶復後該逆卽退守廬郡於近城地
方大肆焚掠擄糧入城意圖死守並分遣僞公天安陳姓等盤踞
廬郡北鄉五十里埠與城賊相犄角多隆阿前隊方抵淮河因廬
境蹂躪過久軍糧無可採辦仍須由鄂省解運不免稽延臣見與
官文李續宜等籌派委員速行運濟正月內必可進攻廬州如廬
城不復勢不能繞赴淮北救援潁州至其攻剿情形應由官文等
會銜馳奏又奏近日各路軍情僞輔王楊七麻子攻圍徽州環逼
月餘斷我餉道張運桂老湘營一軍堅守於內朱品隆唐義訓二
軍援剿於外十二月初八至二十六等日六次大戰屢破屯溪巖

寺等處賊壘連道已通徽郡解圍又另股悍賊從徽南來截官軍
援郡之路亦經左宗棠擊退目下徽州全府肅清左宗棠一軍因
援勦徽州移營婺源分紮白沙龍灣等處鮑超一軍進攻甯國因
羣賊麇聚青陽城內不克遽破又朱品隆回救徽州不克會勦嶺
外是以中隔兩城不能速抵甯國會國荃一軍見在分守七處應
俟新軍募到再行進攻巢縣和州一帶李鴻章一軍見在趕緊募
練應俟二月募齊再行駛赴鎮滬 上諭議政王軍機大臣等會
國藩奏憑陳下情並遵保皖撫各摺片具見該大臣慮遠思深實
深嘉悅會國藩所籌浙省進兵情形雖辦理稍形遲緩然舍此別
無可籌之策已照該大臣所擬諭知左宗棠妥籌辦理所保堪勝
皖撫之李續宜前已降旨調補張亮基才甚可用惟前因滇省需
人該督在滇有年情形熟悉諭令前往督辦軍務嚴樹森調補湖

北巡撫不日即可抵任該撫辦事甚屬認真器局較小軍務恐非
所長自應飭令李續宜先駐六安兼以回顧鄂疆其所需湘勇全
餉卽著該大臣知照官文嚴樹森接續撥解不得稍有欠缺多隆
阿因鄂省軍糧未到未能進攻廬州廬郡一日不克則官軍一日
不得東下恐軍情變遷靡定不可不迅圖克復前諭該大臣將江
南北餉項通盤籌畫原因專恃楚省供應東征必有停兵待餉之
虞仍著該大臣通籌兼濟以期師行迅速徽郡旣經解圍則朱品
隆一軍自可節節進剿與鮑超會攻甯國鮑超浹辰之間疊受厚
恩自當益加奮勵速將青陽縣城攻克以圖進攻甯國爲疏通入
浙之路其餘將弁中如有勇往無前者該大臣不妨先行奏請獎
勵以鼓其氣操縱駕馭全在該大臣調度得宜不必稍避嫌疑會
國荃諒已抵營卽飭馳赴上海李鴻章若俟二月間赴鎮爲日較

遲見在鎮江情形喫緊海全駐守鎮江恐不能得力若非李鴻章
迅往則水陸各軍無人整理甚爲可虞卽著該大臣另籌撥給兵
勇交李鴻章帶赴俟新募之勇齊集再行抽換方合機宜上海兵
勇雖多均不得力李鴻章會國荃迅速赴鎮赴滬則南北兼籌壁
壘一新自可力圖保全以裕餉源前諭該大臣保奏閩省督撫及
江浙等省司道諒已斟酌有人如有堪備封疆之任者該大臣仍
當訪察具奏朝廷黜陟之權原非封疆大吏所能侵越第該大臣
簡任綸扉督師江皖膺股肱心膂之寄朕疇咨岳牧延訪甚殷該
大臣圖濟時艱不當稍有避嫌之見方合古大臣知無不言之義
嗣後如有所知不妨密封呈進以備採擇另片奏翁同書貽誤各
情不避嫌怨甚可嘉尙惟袁甲三與翁同書同辦一事而該大臣
並未參劾諒因同爲統帥未便奏參殊非委任之意嗣後務當以

國事爲重斷不可存此等意見方能裨益朝廷至該大臣奏報以後總宜隨時具奏我兩宮 皇太后孜孜求治並不憚於披覽也將此由六百里諭令知之○諭會國藩奏圖浙之道惟衢郡可以圖存欲保衢州必先守廣信玉山而後有運糧之路欲復杭省必由徽州以攻嚴州而後有進兵之路見飭糧臺籌撥餉糈軍火並於玉山設立轉運局源源接濟衢防兵勇至進攻嚴州則專賴左宗棠一軍必先掃清歙縣婺源之零股攻克開化遂安之堅城乃能達於嚴郡等語所籌於地勢軍情深中窾要見在徽州解圍全府一律肅清左宗棠一軍已移紮婺源分駐白沙龍灣等處卽著乘此聲威會合朱品隆等軍於開遂婺源一帶相機進剿庶可牽制賊勢不令匪蹤再來攻撲徽郡致分兵力至李定太統領衢防能否堅守待援並著左宗棠察看一切妥籌兼顧一面迅催劉培

元來衝應須更換卽迅速馳奏務保名城以爲進取之路該撫謀略素優想自能熟思審計毋失事機也所有近日布置及進取情形仍著懍遵前旨隨時迅速具奏將此由六百里諭令知之○諭勝保鄭元善奏汝軍進剿平輿連克賊壘並勝保奏督師抵豫先飭馬步各隊進解潁圍各摺片見在潁郡被圍情形甚急勝保已飭副將劉景芳等各率所部赴援合之成祿前隊官兵共六千有餘兵力亦不爲單薄且附近被脅各圩亦各聞風歸正卽宜乘此聲勢嚴飭成祿等星速前進盡力勦洗務與潁州城內消息相通不得以賊眾兵單藉詞逗遛致干重咎後路兵勇計已全數渡河著卽飛催前進齊赴潁郡迅解城圍該大臣擬進紮陳州督率勦辦仍著隨時體察情形如赴援各軍必須親自策遣方能得力該大臣卽由沈項一帶進發毋誤事機楊飛熊兵勇三千餘名勝保

既與鄭元善商令派赴汝甯歸張曜調度疏通驛路應否進攻平
輿賊巢抑就近進剿潁郡爲勝保各軍後路聲援之處著勝保鄭
元善酌度緩急情形辦理至勝保請於穆騰阿傅振邦二員中簡
派一員幫辦軍務穆騰阿見在京城訓練旗兵不能派令前往其
傅振邦一員已諭知僧格林沁譚廷襄卽飭該員前赴勝保軍營
俟到營後再降諭旨金安清業經革職押赴袁甲三軍營銷算該
革員與汪曜奎共事最久非此人到營不能對質汪曜奎見在勝
保軍營著迅飭前赴袁甲三軍營會同金安清銷算毋任遲緩將
此由六百里各諭令知之○調畢道遠爲倉場侍郎由兵部調○以徐
宗幹爲福建巡撫由前浙江布政使遷未到任前以學政厲恩官暫署○丁
未諭內閣前因御史任兆堅奏請將已革大學士柏葰情罪昭雪
一招當經降旨交禮刑兩部會同將原案悉心確查秉公詳議茲

據該部覈議具奏此案柏棧聽信家人靳祥之言輒將浦安房內
試卷取中是其聽信屬託罪無可辭惟承審此案之載垣端華等
因刑部並無僅聽屬託明文輒敢妄議定擬比照交通屬託賄買
關節之例擬以斬立決覈其情節尙不至此總由載垣等與柏棧
平日挾有私讐欲因是擅作威福又竊窺皇考痛恨科場舞弊
明知必售其欺竟以牽連蒙混之詞致柏棧身罹重辟恭讀是日
皇考文宗顯皇帝聖諭有不禁垂淚之語仰見皇考不爲已
甚之心今我兩宮皇太后政令維新事事務從寬大平允於柏
棧正法一節反復思維謂爲無罪實有不能該御史所請昭雪情
罪之處未免措詞失當惟念柏棧受恩兩朝在內廷行走多年
平日辦公亦尙勤慎雖業已置之重典亦當推皇考法外之仁
柏棧之子候選員外郎鍾濂卽著該旗帶領引見從前承審此案

之王大臣除載垣端華上年均賜自盡陳孚恩亦經另案發往新疆外吏部尙書全慶於載垣等定擬此案時不能悉心覈議附和成讞聯名入奏實屬瞻徇著交都察院議處用示原情準法一秉大公之至意○諭前據薛煥奏杭州城陷當經降旨令會國藩等將瑞昌王有齡殉難情形及在城文武下落查明具奏茲據會國藩奏查明瑞昌王有齡均已殉難懇請賜卹等語杭州將軍瑞昌於前次浙江省城失守時堅守駐防城垣鏖戰待援六日之內卽將省城克復厥功甚偉茲復臨難捐軀忠烈卓著大節凜然可嘉可憫瑞昌著追贈太子太保銜照將軍陣亡例從優賜卹任內一切處分悉予開復所有前次賞給二等輕車都尉世職著加恩改爲一等輕車都尉世職承襲六次襲次完時給予恩騎尉世襲罔替浙江巡撫王有齡前經顏宗儀等延祐朱潮等先後以勸捐

斂怨不能勝任等詞參奏疊經諭令曾國藩查明具奏旋據奏稱該撫在浙因官紳不和又不能制馭兵勇以致債事等語王有齡雖疊經被人參劾惟此次賊氛環逼省垣尙能激勵兵民登陴固守至兩月之久卒以糧盡援絕見危授命大節無虧殊堪憫惻王有齡著照巡撫例從優賜卹任內一切處分悉予開復應得卹典該衙門察例具奏用示朕篤念忠節至意尋予祭葬瑞昌諡忠壯王有齡諡壯愍○諭據馮子材等奏鎮郡城圍已解並將馬陵等處賊壘踴毀惟探聞江陰賊匪製造雲梯數千架豫爲犯鎮之用常州至丹陽一帶屯有僞王三名意圖攻犯鎮城僞忠王尙有前來接應之說約正月十七日大舉撲鎮等語前因鎮城喫緊疊諭曾國藩飭令李鴻章赴鎮以資防剿馮子材前諭馳赴上海是否業已起程海全接辦後都興阿白當安籌兼顧會合揚防援應之

兵認真堵剿魁王統帶旗營官兵協同固守毋許稍有疏懈惟賊情詭詐恐爲聲東擊西之計揚防亦關緊要都興阿務當加意嚴防未可稍涉大意將此由六百里加緊各諭令知之○諭據樂斌奏撤回糾眾復出滋擾調兵堵剿並自請議處又將前保出力文武先行撤銷等語覽其所奏實因西碾二邑土庶呈控探知沈兆霖等業已入奏不能復爲隱諱其居心甚屬巧詐該督貽誤地方至此豈議處所能了事所有撤回復擾碾伯及派兵堵剿各情形卽著沈兆霖查明籌辦回民起釁根由據樂斌奏稱因西碾土民總以須盡剿滅爲詞該縣民團無端將巴燕戎格打牲回民殺斃三人又與番僧勾結稱欲淨洗米拉溝回民以致回民糾合撤回互相爭鬪雖所言未必盡實第漢回不和到處皆然均係國家赤子必得查明曲直秉公辦理不可稍存漢回之見致有偏倚方能

折服其心樂斌所調官兵如不得力卽著沈兆霖再行酌調儻官兵不能操必勝之權稍有挫失貽患更多此事關緊緊要沈兆霖見署督篆責無旁貸務當通盤籌畫計出萬全原摺發給閱看將此由四百里諭令知之○諭托明阿等奏川匪竄擾喬莊見飭總兵阿揚阿親督標兵相機堵剿等語四川丹棱股匪前經官軍進剿將逆首藍潮鼎殲斃尙有藍潮柱訾洪發謝寡婦諸逆竄往浦江等處見在謝寡婦等匪竄近陝邊亟應迅速殲除俾免滋蔓著托明阿等飛飭該總兵嚴密防剿張芾亦須激勵鄉團會同官軍竭力守禦不可有名無實致令該匪闖入漢中等處完善地方並著駱秉章調派得力將弁分路繞出賊前會同該地方官督率紳練盡力剿洗務將竄近陝邊各股匪徒搜捕淨盡勿畱餘孽至托明阿等所稱商雒潼關等處防堵均關緊要奉調官兵勢難如數

調撥自係實在情形卽著照該將軍等所擬辦理將此由六百里
各諭令知之○以彭玉麟爲兵部右侍郎候補侍郎○戊申諭議政王

軍機大臣等文煜奏查勘海口形勢籌議設防一摺大沽海口礮
臺雖由英法二國撥兵駐守仍應隨時體察情形暗中防範以免
臨時掣肘所有北塘防守分兵練勇各事宜卽照該督等所奏辦
理該督等務當斟酌時勢悉心布置北塘與營城旣分駐重兵必
須勤加操練聲勢聯絡一遇有警卽當互相援應其天津郡城兵
勇亦當逐日訓練以資防範文煜成明所挑督提各標兵並咨調
密雲官兵均著照辦惟京旗兵丁見在趕緊訓練如遇必須調撥
之時再由文煜等隨時馳奏至每月需用餉銀除諭知山陝兩省
查照前案籌撥外其鹽斤復價及釐捐等款著准其畱於天津給
發兵餉此外如有未盡事宜該督等仍當公同籌議隨時馳奏以

恩厯念將此由四百里諭令知之○勝保鄭元善毛昶熙奏臣勝保督師抵汴臣毛昶熙於十七日馳抵省垣與勝保鄭元善會晤籌商查皖豫軍情以潁州之圍爲最急見在總兵成祿並副將劉景芳兩軍行抵太和縣境已飭該鎮將轉戰而前沿途掃蕩臣勝保卽日親統大隊進紮陳州督率馳剿以期迅解潁圍至宋東一路爲臣毛昶熙專責刻下蒙亳各捻疊經僧格林沁大兵剿敗賊勢已蹙尙未裝旗出竄惟金樓馬廠二圩負隅如故應乘賊勢未動剋期攻拔疏通進兵之路已由臣毛昶熙督飭前敵將士設法進攻宋陳潁均爲接壤宋軍與援潁之師彼此可資聲援自當聯絡策應以成犄角之勢臣勝保統率大兵由陳州東進一俟潁州解圍卽當會合豫軍由陳州歸德鹿邑三路並進直擣蒙亳埽穴擒渠以除巨患至陳屬沈項一帶爲援潁大軍後路餉道所關尤

爲緊要伏莽甚多該處原有王永慶丹凌雲王同聲等三營並李永祿馬勇一營扼紮防剿本歸副將楊飛熊調遣見因該副將改赴汝郡鞭長莫及已飭陳州府知府劉拱宸就近調度相機策應以保後路而通餉道汝甯張曜一軍屢有捷報剿辦漸已得手惟平輿逆寨日久未下確羅信息一帶賊勢縱橫近又有張落刑逆黨張耀林等率眾攻撲光州雖經官兵擊退而賊蹤未遠仍恐勾結滋蔓經臣鄭元善會同臣勝保飭派副將楊飛熊督率省防馬步三千人馳赴汝甯隨同張曜一軍併力剿辦並飛催副將余際昌迅提新募昌勝營楚勇取道信陽將該處土匪掃除然後一意東征可無掣肘之患又奏臣連日飭派大員會同開封府督催後起各隊迅速過河十五日後誠順七營僅渡五營其餘兩營降眾因風大船少未經過渡該降眾等稽留河干風餐露宿未嘗此苦

遂多變計思歸雖據稟稱情願歸農各安生業臣以新收之眾究恐野性未馴一經遣散難保不別滋事端未便允准當飭副都統明慶帶領馬隊五百名授以機宜馳赴北岸沿途攔截押令折回歸隊如果該降眾等懍遵軍令迅速過渡臣仍當督帶南行儻敢違抗立即懾以兵威相機辦理毋稍姑息以絕北路後患明慶俟此事辦竣卽令馳赴臣營聽候調遣臣仍親督大隊剋日自汴起程進紮陳州督飭前敵各軍迅解潁圍上諭潁州被圍已久總兵成祿等旣已行抵太和著勝保催令星馳赴潁速解城圍其沈項等處業經勝保等派令知府劉祺宸督率兵勇以爲成祿等後路援應惟潁州賊勢甚張如成祿等軍不敷勦辦勝保自應速由陳州移營前進卽著該大臣酌度情形妥爲辦理金樓馬廠圩匪著毛昶熙督飭將士迅圖克復其平輿逆寨及光州等處竄匪並

著鄭元善催令張曜楊飛熊等實力攻剿速爲掃蕩一俟豫省境內肅清潁郡解圍即可分兵三路進擣蒙亳以爲掃穴擒渠之計誠順兩營降眾變計思歸未經渡河據勝保奏稱已派副都統明慶馳往北岸辦理該降眾等狼子野心旣已思歸爲名難保不滋生事端如再敢抗違軍令不卽渡河卽著勝保等添派官軍密速兜捕悉數殲除以去肘腋之患儻該降眾有竄擾河南省城及各處郡縣等事必治勝保以辦理不善之罪不得稍存玩視謂可全諉其責於明慶也該兩營降眾頭目係何姓名著勝保查明具奏將此由六百里各諭令知之○諭楊載福奏母病未痊舊疾復作懇准續假調理一摺見在水師分防池州等處江面亟須會合陸軍進剿巢縣和含各城賊匪以期直擣金陵殲除首逆機會萬不可失水營雖有得力將領必須該提督躬親調度方能動合機宜

該提督忠勇性成朝廷正資倚畀值此事勢多艱自當移孝作忠
力圖挽救摺內自稱傷疾復發亦不妨赴營調治藉資坐鎮楊載
福接奉此旨卽著迅速起程前赴池州軍營商同會國藩剿辦沿
江賊匪毋稍延緩將此由五百里諭令知之○諭前因捻匪由徐
州竄擾沭陽諭令僧格林沁派撥馬隊助剿旋據僧格林沁奏已
派前敵馬隊赴碭山扼紮並已飭德楞額作速進剿茲據吳棠奏
該逆由沭陽分竄安東王營並淮安下關劉伶臺等處復有另股
分竄阜陽之東溝淮安東鄉之車橋等地方匪眾兵單勢難抵敵
請飭僧格林沁速撥馬隊前來助剿各等語捻匪竄擾沭陽雖經
吳棠派兵截擊而匪勢蔓延日甚設再任令南趨則裏下河各完
善地方將不可問海州贛榆逼近東省設由該處回竄則北犯可
虞僧格林沁前奏該逆誘我東剿不爲無見惟此時逆燄日張淮

安以南豈可再任蹂躪且該匪既可由海州北犯則雖嚴扼碭山亦復何益著僧格林沁仍遵前旨速撥馬隊二三千名派員統帶剋日前往清淮協同勦辦德楞額一軍並著由臺莊星夜起程馳赴汴陽一帶相機會勦斷不准藉口耽延致有貽誤田在田督辦徐宿軍務孤軍恐難抵禦著卽歸僧格林沁節制以一事權應否飭令該總兵督率所部馳往東路會同吳棠以利攻勦之處卽著該大臣妥爲調遣吳棠仍就見有兵力於南北兩路實力堵勦不得任令紛竄吳端書著准其暫畱江北督辦團練將此由六百里各諭令知之○諭前因總兵穆正春在豫正資得力諭令嚴樹森卽飭折回河南仍率所部交鄭元善調遣茲據嚴樹森奏稱穆正春係屬同里相知有素去年奏調來豫到營後事事認真頗爲豫軍所嫉李世玉王國良周兆常均與穆正春患難相從殊難暫離

請仍准隨帶赴鄂等語御將之道欲用其力必須先得其心穆正春既願爲該撫帶往自應俯如所請以資臂助所有穆正春四員及嚴樹森親軍馬步五百五十人均著准其隨帶赴鄂周鳳山一軍著仍遵前旨畱於湖北歸該撫調遣鄂省軍務吏治本極整頓見在該撫帶往之穆正春等又甚得力嚴樹森到任後務當振刷精神於一切防剿事宜與官文等和衷商辦共濟時艱與前撫胡林翼媲美以期不負委任將此由五百里諭令知之○諭徐之銘奏逆回竄踞附省地方見籌防剿一摺據稱澂江昆陽回匪久踞城池節經嚴飭署澂江府知府岑毓英專剿澂江署遊擊錢體元駐防晉甯專剿昆陽岑毓英已將澂江所屬之竹山一帶回營逐節攻毀逆首馬起等因被剿窮蹙由晉甯呈貢地面竄至省城附近小壩等處分踞紮營總兵林自清擊賊獲勝等語澂江逆回所

紮連營既被官兵逐節攻毀賊勢已就窮蹙何以逆首馬起等反
敢直撲省城且晉甯地方既派有錢體元駐防何以竄撲省城股
匪卽由晉甯一路而來其昆陽一股因何遽與澂江回匪同時合
夥錢體元曾否與昆陽股匪接仗見在呈貢昆陽兩城是否已爲
賊踞均未據該撫奏及逆匪於省城外之小壩六家營大樹堡江
右館各處紮營城門晝閉是該逆已將省垣圍困不僅止在附省
地方屯踞該撫所奏情節種種支離難保無諱飾情事省垣地方
關緊緊要潘鐸身任兼圻張亮基督辦軍務均屬責無旁貸務當
星夜馳赴滇省督率將士力解城圍並將徐之銘所奏情形有無
欺飾據實查明覆奏徐之銘所奏攻克麗江府城勦辦情形是否
屬實所保員弁是否確係出力著潘鐸會同張亮基一併查明具
奏徐之銘原摺二件均著鈔給閱看將此由六百里各諭令知之

○命咸保訓練山海關兵丁防賊北駛諭英桂瑛榮籌撥北塘軍餉○命薛煥月籌銀五萬兩解鎮江軍營充餉○己酉袁甲三奏江浦縣橋林地方及和州所屬之烏江均有賊營臣飭李世忠相機勦辦正月初八日李世忠派總兵王茂元副將李顯爵帶隊進攻該提督自率小隊接應王茂元前隊直抵橋林出其不意一鼓而進後隊繼至賊勢不支踰牆紛竄立將該逆頭營攻破其餘二營開門逃逸我軍跟蹤追殺斃賊五六百名李顯爵一軍同時行抵烏江悍賊二千餘人迎頭衝撲李顯爵以排槍連環轟擊賊眾敗退我軍左右包鈔將守營老賊二百餘名斬殺殆盡乘勢擁進烏江街內立將賊營踏毀斃賊千餘名江邊尚有賊營二座見仍趕緊圍攻如可得手則與楚軍水師駐紮之地僅隔四十里聲息可望漸通見據探報楚師圍攻巢縣賊已窮蹙惟和州含山尚有

踞賊臣已密致李世忠相機攻取如巢縣不日克復更可與楚師聯絡以收夾擊之效至廬郡之賊負隅死守力梗南北要路使楚皖兩軍無從會合陳玉城盤踞城中積運薪米守備甚嚴其附近北路及東北西北各路民練約近百圩均已一律薙髮豫備攻取但該城周圍四十里牆高池深非偏師所能制勝臣見飭練眾五千餘人分布定廬交界各圩一面另抽官兵選派將領屆期統帶分進並函致曾國藩多隆阿密訂日期如楚師滾營前進皖軍卽進攻梁園店埠以冀會埽賊氛臣惟隨時體察情形妥爲辦理至橋林毗連江浦爲江北最要關鍵應與江浦浦口兩城均由都興阿派撥大隊分別防守以固藩籬上諭議政王軍機大臣等官軍自攻克浦口後進擣橋林烏江賊營奪回要隘辦理尙爲安速惟江邊尙有賊營二座如再攻剿得手則與楚軍水師駐紮之地

僅隔四十里聲息可通著李世忠趕緊圍攻將賊營二座一律掃蕩以期疏通江路與楚軍水師聯絡聲勢陸路中隔廬郡狗逆踞守城中守備甚嚴且力梗南北要路使楚皖兩軍無從會合著官文會國藩迅催多隆阿等軍滾營前進袁甲三卽將分布定廬交界之五千餘人另派統帶約期並進先將梁園店埠攻克以期會埽賊氛不可稍有遲誤會國藩前有正月內必可進攻廬州之說見在巢縣賊勢窮蹙著官文會國藩卽飭帶兵各員迅速進攻與李世忠一軍前後夾擊巢縣一復卽可會合進剿和含以期節節掃蕩力拔廬郡堅城以振全局橋林及江浦浦口兩城南經收復亟應添兵駐守惟鎮江一城賊氛環逼李鴻章等兵勇未到以前都興阿卽須派撥重兵妥籌兼顧儻兵力不敷防守橋林等處仍由李世忠派兵駐紮以固藩籬馮子材是否起程海全接辦後著

即將防剿情形隨時馳奏以慰厯懷再本日據龐鍾璐奏浦東一帶賊氛蔓延數百里上海腹背受敵又據探報賊目黃詳慶欲由江陰竄渡靖江並探聞賊在白茆劉河等處擄船欲由常熟太倉分竄崇明窺伺通海見存州縣勢皆岌岌可危等語著會國藩飭催會國荃星速赴援上海並催李鴻章迅赴鎮江其靖江通海等處無重兵駐紮專恃民團堵禦實形單薄並著都興阿酌派兵勇分路防剿毋稍疏虞將此由六百里各諭令知之○袁甲三奏前據署壽春鎮總兵博崇武等面稟壽州附近各圩漸多雜髮似有轉機經臣告以該練句結捻粵各逆竄擾潁郡萬無就撫之理飭令傳諭苗沛霖如能速除潁州之賊自明心迹再行酌量辦理茲據博崇武回稱苗沛霖專心剿賊見已議定解潁州之圍於本月十六日派隊由南路三河尖一帶援潁並因張落刑眷口黨夥均

屯潁上縣擬於二十日外進偪潁上俾令張逆回顧潁郡之圍自解並懇函致李續宜如帶兵前赴潁壽勿遽以苗練爲賊又云賈臻兩次函致苗沛霖屬其速援潁郡等語臣察其情詞顯係怵於楚師聲威恐楚皖夾攻萬難自立且探聞張逆自竄過正陽關後因與苗練爭糧大相牴牾各圩亦因苗練接應捻粵過河眾心甚多不服見在東路各圩既逐漸歸官西路亦有渙散之意苗勢漸蹙又爲此自全之計原難遽信且賈臻從前一意主勦頃鈔咨上年十二月奏彙云刻下情形又變請暫示羈縻臣以爲自古用兵未有不能勦而能撫者見探潁圍已鬆粵逆亦有南竄之信而賊蹤未遠仍恐再圖勾結併力一逞更難收拾若能使該練與粵捻互相猜忌一經接仗其勢自離未始非援潁制賊之一法臣見已札飭博崇武率所部壽春兵丁督飭苗練迅掃竄潁之賊以定功

過所謂將計就計非遽易勦爲撫也至蒙城官紳自上年正月間團練守城與苗爲敵該處西北偏近捻巢東南均係苗練黨與臣每擬撥駐一軍以固人心因後路梗阻糧道難通是以未果今苗練既願西去勦賊則我以禦捻東擾爲名分兵駐蒙亦係箝制之計臣已挑選隊伍一俟該練進圍潁上卽飭尹善廷統帶官兵前赴蒙城駐紮收撫圩練以孤賊勢而圖進取臣惟就智力所及隨時妥籌斷不敢拘泥成見上諭苗沛霖罪大惡極斷難姑容見因楚軍勢大衆心離散陽以就撫緩我師卽陰以赴援圖潁郡其謀甚狡若令入潁州則潁州又將爲壽州之續辦理更難著手昨據勝保奏已由汴省赴陳州成祿等軍已抵太和當諭令勝保如賊勢甚張卽由陳州移營前進袁甲三一面派隊收撫附近各圩一面知會勝保催令成祿等軍節節進勦仍卽迎探李續宜何時

起程商令督飭蔣凝學等分路進兵我軍愈壯苗勢愈孤一俟李續宜入皖便可爲一鼓殲除之計見在各兵未集不妨外示羈縻令與粵捻各匪互相仇殺然後相機智取可毋庸重煩兵力博崇武爲苗練心腹其言未可輕信該大臣惟當遵奉歷次諭旨一意剿賊斷不可稍涉游移致滋貽誤將此由六百里諭令知之○諭有人奏嚴樹森到豫撫任後督辦剿匪事宜未臻盡善復有人奏嚴樹森自到河南巡撫之任惟知株守汴梁上年九十月間捻匪竄擾南陽適新募楚勇八千到豫該撫擁兵自衛未派往援此膽之怯也省城兵勇口糧絲毫不欠宋汝二營積欠累累該撫旣爲豫吏自宜就本省兵勇力求整頓乃謂非楚兵楚將不能得力宋營兵勇裁去一萬僅畱五千捻匪沿邊搶掠金樓教匪乘虛滋事東省土匪擾及睢甯該撫復不發一旅此見之偏也勝保督辦皖

豫軍務行文查取兵數豫籌軍餉該撫不肯將兵數知照並告以不能接濟兵餉勝保派隊進紮商邱睢州等處該撫飭令驅逐出境在該撫之意不過恐勝保奪其兵柄故爲阻撓其迹實已近於跋扈此量之狹也疊奉諭旨催令各路軍營會擣毫捻老巢該撫仍以保守中土爲言堅執己見此性之愎也惟操守尙好畱意吏治並非無用之材各等語嚴樹森仕鄂有年前經胡林翼奏保仰蒙 皇考擢任豫撫到任以後尙無大過而人言嘖嘖諒非無因其辦事尙爲誠實未加查辦疊經訓諭冀其悛改見已將該撫由豫調鄂該省調兵籌餉一切事務煩劇與豫省無異嚴樹森能否勝任抑僅長於吏治他務非所素習官文自必知之甚悉著卽秉公覆奏儻實有膽怯見偏量狹性愎等病致於大局掣肘不能勝封疆之任著據實密陳無稍徇隱將此密諭知之○諭前據麟

魁等奏撤回滋事情形旋據沈兆霖奏麟魁於差次出缺當諭沈兆霖暫署陝甘總督並諭崇實馳往甘肅將樂斌被參各款及撤回滋事各情會同沈兆霖辦理茲據沈兆霖奏飭傳回民馬尒三與西碾士民對詞並未到案該匪於上年官兵撤回後其膽愈張本年正月十一日碾伯縣城東高廟堡地方復有撒匪千餘出山焚掠亟宜痛加勦辦以示兵威方可議撫惟多慧等用心乖謬請另簡大員妥籌勦撫等語土回勾結撒匪出巢搶掠非痛加懲創斷難馴服沈兆霖所稱調派官兵番兵將滋事之戎屬四工分道圍剿俟勦洗一二回莊匪眾瓦解然後責令擒獻首惡方可一勞永逸所籌均合機宜著卽照議迅速調撥官番各兵將四工滋事撒匪實力勦辦若能誘除馬尒三回眾先已失勢該匪眾果能震懾兵威擒獻首惡妥籌安撫爲一勞永逸之計餉需一項據奏該

省尙堪敷用並著先期籌備毋致臨事掣肘至多慧等辦理錯謬扶同欺飾冒功各節應俟樂斌被參各款查辦完竣時一併明降諭旨將此由五百里諭令知之○庚戌諭內閣慶端奏官軍擊賊獲勝衢郡解圍常山克復一摺逆首李秀城自竄陷常山後欲與龍游踞匪夾攻衢州府城總兵李定太等先後出擊屢有斬殺該逆復以大隊衝撲東門城上疊開大礮並分兵出城迎擊賊眾潰敗擒斬甚多又探知賊於東南兩處設伏我軍直撲賊營兩面合攻蹋毀賊營四座復將東南賊壘全數蹋平餘賊逃至銅錢嶺等處踞守亦經官軍攻破賊向東北一路逃竄其常山縣城亦卽克復所有出力各員著慶端查明擇尤保奏○諭薛煥奏洋人助剿出力懇請獎勵等語逆匪撲犯松江經美國人華爾帶領洋槍隊直入迎旗浜賊營列隊轟擊斃賊千餘人擒斬數百人復會合官

軍進攻天馬山辰山賊營首先衝陣所向辟易將賊營十一座一律踴毀洵屬異常出力華爾曾在道員失煦及美國領事處稟明願伍中國臣民更易中國服色具見惻忱華爾著賞給四品頂帶花翎仍令在松江教習兵勇協同官軍剿賊並著薛煥傳旨嘉獎○諭議政王軍機大臣等薛煥龐鍾璐奏松江擊賊獲勝及各路防剿情形一摺賊匪以大股攻撲松江經參將李恆嵩督兵擊剿疊獲大勝其分撲浦東高行鎮等處賊匪亦經知府劉卣膏等先後擊退防剿尙爲得手仍著薛煥督飭各路在防將士實力堵截相機進剿毋稍鬆懈一俟援師大集即可悉殲醜類並著龐鍾璐督率紳董辦理團練協助官兵妥籌捍禦至借助西兵一節日來經總理衙門與英法兩國公使籌商據英國公使言事屬可行惟可暫而不可常當告以見因援兵未到故須借助外國一俟勁旅

雲集自可無須協助至天津防務則須俟購有輪船兵力方厚該使臣亦頗首肯至法國助兵尙無成說並據該使臣言吳淞開礮擊賊是法國人之事而諭旨則謂英法各員協助勦辦頗爲不平洋人務求實際此後薛煥等奏報軍情斷不可稍有飾說至見在與洋人如何商議已否得有眉目並著一面辦理一面據實馳陳俾總理衙門洞悉情形其購買船礮一節前據赫德聲稱已函致李泰國令於伊國購辦見復據英國卜使照會香港尙有船礮可以購買卽著薛煥詢問赫德如一可於香港購買自較便易其應需價值銀兩並著速爲籌備毋致臨時掣肘將此由六百里諭令知之尋奏遵詢赫德香港無可購買見託英國代辦可期堅實適用報聞○諭前因有人奏福建藩司裕鐸日事荒謔又與在籍知州姚鏡圖往來狎密招搖射利巡撫瑞璜老病聾瞶不能治事當

經諭令慶端查明參奏茲據該督奏稱裕鐸並無挾妓讌會等情
姚鏡圖亦無招搖射利情事瑞璫氣體素健勵精圖治吏畏民懷
等語覽其所奏無非意存欺飾深堪痛恨卽如瑞璫之老病昏庸
豈能隱諱乃轉稱其勵精圖治吏畏民懷實屬有意蒙蔽當此百
廢待舉之時若不痛改積習力小整頓則吏治地方何由日有起
色所有裕鐸參款著改派耆齡徐宗幹會同審辦該撫等何人先
到卽行訪查具奏藩司爲方面大員如果貪劣至此豈容肆於民
上所關於風俗人心者甚大斷不准有一字虛假儻狃於官官相
護之見稍有徇隱則該撫等自取愆尤恐難當此重咎也瑞璫因
京察勒令休致如查有廢弛公事等情一併嚴參原摺並慶端覆
奏摺各一件均著鈔給閱看左宗棠軍餉業經寄諭沈葆楨力籌
解濟仍著耆齡徐宗幹於到閩後妥爲支應毋得專待江省協濟

致令缺乏將此由六百里各諭令知之○以克復福建福鼎縣城
賞總兵官秦如虎提督銜○追予杭州將軍瑞昌浙江巡撫王有
齡於死事地方建祠並入祀各本籍昭忠祠○予浙江杭州殉難
提督饒廷選謚莊勇張玉良謚忠壯總兵官文瑞謚果毅繼興謚
愍烈副將楊金榜謚壯勇均祭葬世職加等於死事地方建祠並
入祀各本籍昭忠祠○調吉林黑龍江馬隊各二百五十名赴揚
州軍營○辛亥諭內閣鄭元善等奏會保河南第一賢員請旨破
格錄用一摺據稱河南署祥符縣知縣朱光宇才守兼優膽識並
壯惠足孚民勇能禦寇歷官各處卓著循聲洵爲河南第一賢員
自應破格獎勵以資觀感朱光宇著免補直隸州知州以知府畱
於河南歸候補班前酌量補用並著署理開封府知府事務責令
將各縣團練實力整頓俟辦有成效卽著鄭元善奏請實授○諭

議政王軍機大臣等駱秉章奏探聞貴州清鎮縣團首何山斗因
倡捐未遂田興恕執而戮之該處百姓積憤已深遂將釐金局委
員戕斃見在聚眾數萬豎貴州十三府總團旗號聲稱圍省殺趙
國澍方休田興恕見委韓超馳往辦理等語貴州省軍餉短絀自
不能不勸捐抽釐借資接濟第該省地瘠民貧必須承辦得人於
徵取之中寓拊循之意方不至苛擾閭閻若任令不肖官紳藉端
惡索而所得款項又不能功歸實用殄除寇盜保衛地方何以服
羣情而平眾怨趙國澍以總辦團練爲名肆行殘擾前已被人參
奏此次清鎮縣民因田興恕妄戮團首何山斗豎旗聚眾欲赴省
垣欲殺趙國澍以洩恨是趙國澍平日強橫不法斂怨於民已可
概見韓超見赴清鎮縣查辦如業已解散仍著將趙國澍練總名
目撤銷聽候參辦如民心尙未帖服必得趙國澍而後快卽著先

行從重懲治以順輿情斷不可遷就姑容釀成巨案韓超見署貴州巡撫責無旁貸該省釐捐各局官紳並著認真裁汰簡任賢能是爲至要都勻思南石阡等處賊氛密布疊經諭令田興恕出省勦辦不得以居中調度爲名安居省城該提督曾否起程並著韓超一併查明具奏將此由六百里諭令知之尋奏何山斗惡蹟昭彰被誅後黨與滋事旋即擊散趙國澍請求團務任勞任怨並無肆行殘擾之事黔匪股數甚多田興恕俟將各路布置周密卽行出省督勦報聞○諭略秉章奏遵查田興恕年少意滿目不識丁故劣幕奸商得售鑽營之術所辦捐釐係爲籌備軍餉而委員肆其苛虐百姓蓄爲怨恨其所取於民者又未必能歸實用並聞比在省城折毀民房大興土木起造欽差大臣府第若非痛加裁抑無以平服該省士民之心將來督臣潘鐸辦理雲貴軍務必得使

有馭將之權方可以收討賊之效等語見在都勻思南石阡各府賊勢密布雖由該督咨令田興恕迅速統兵出省早圖收復並剴切勸諭未知能否及時悔悟力圖補救該提督自被人參劾曾經疊次寄諭嚴加訓誡儻知儆省或能改過自新潘鐸道出川中與駱秉章會晤著卽將黔省軍務妥爲面商應作如何辦理之處迅速奏聞其探聞清鎮縣團首何山斗因在黔省勒捐被戮該處百姓積憤將釐金局委員戕斃聚眾數萬豎貴州十三府總團旗號聲稱要圍省城殺趙國澍方休一節事關官激民怨恐致滋生事端韓超見已有旨令署貴州巡撫業經寄諭妥爲辦理仍著駱秉章隨時偵察如有可兼顧之處勿令激成事端方爲妥善將此由六百里諭令知之○壬子諭議政王軍機大臣等前因潁州被圍情形危急諭令僧格林沁督飭西凌阿由歸德赴援勝保鄭元善

督催成祿楊飛熊等軍分援勝保卽相機繼進袁甲三設法撥兵
援應並據李續宜奏於本月二十四日起程赴皖惟須先往安慶
已派成大吉等由霍進援潁郡茲據賈臻奏本月初七日東北關
地道堵住後賊匪復添築數營圖再窺並於劉家花園築營欲
奪西北關大石橋開口參將李璋於十五日出擊賊援紛至勢極
兇很見於郡城東南西三面玄掘長壕爲久困之計城大兵單子
藥米糧均已缺乏再延旬日則賊壕成文報不通必致進援無
路等語潁郡爲淮北根本豫省藩籬被圍數旬萬分危急勝保奉
命援救李續宜身任地方均屬責無可貸乃成祿一軍早已行抵
太和何以日久尙未到潁著勝保嚴飭該員星馳前進儻敢再事
遷延卽著從嚴參辦該大臣亦卽由陳州督兵繼進毋稍遲緩成
大吉是否起程著李續宜嚴行督催勿令觀望袁甲三昨奏有派

博崇武援潁之議未知能否得力該大臣專辦淮北軍務務當設法救應毋許膜視西凌阿如抵歸德楊飛熊駐兵沈項均係勁旅且去潁州極近並著僧格林沁鄭元善遵照前旨飭令統兵速進立解城圍賈臻仍當激勵將士實力守禦以待援師將此由六百里加緊各諭令知之○諭張亮基奏遵旨赴滇查辦一切並縷陳剿撫事宜各一摺滇省漢回構怨稱兵連年民間久淪水火加以徐之銘專恣妄殺怙惡不悛亦應先行撤任查究以肅官常張亮基擬於湖南措銀數萬金募勇一二千管帶入滇著卽趕緊布置就緒卽行兼程就道潘鐸已過晉省亦著探明道路剋期前進於到滇後與張亮基會商籌辦毋稍稽延張亮基所陳辦理漢回剿撫事宜一摺甚合機宜漢回構釁互有曲直漢民亦有奸宄同民豈乏馴良惟在地方大吏不存成見秉公查辦先推原其所以肇

歟之由從公剖斷折服其心其中如有畏罪就撫之人卽須結以恩信其有尋仇結怨不肯就撫者勢不能不示以兵威回抗則剿回漢抗則剿漢無所偏重則畛域不分漢回皆吾赤子剿辦之法止分良莠不分漢回名義既正方可破其奸謀而生其悔悟總在潘鐸張亮基相度機宜妥爲籌辦至剿辦之法應由何路先行著手扼其要領及一切籌畫餉源挑揀漢練各事宜卽著潘鐸等悉心籌議毋或再有貽誤致令不可收拾其徐之銘參款及先後保奏各員並著遵照疊次寄諭會同查辦毋稍徇隱將此由六百里各諭令知之○李續宜奏疊奉諭旨飭令救援潁郡臣思潁州關繫大局自應速籌援應第施南襄陽德安等處警報頻至雖來鳳已經克復而臣部之在鄂者防備尙難鬆勁未便概調赴皖惟有於見駐霍六之軍權其緩急量爲撥調見擬令駐霍之記名提督

成大吉總兵蕭慶衍各率全部赴援潁州又以孤軍深入兵食維艱並飭道員葉兆蘭隨同大軍前行就近商度軍情籌畫糧餉至六安爲鄂省東北門戶兼偏壽春自應仍畱道員蔣凝學一軍嚴密備禦臣惟有督飭將士盡力勦賊固不敢輕率以誤全局亦不敢遲緩以失戎機至皖省一切事宜俟臣抵安慶後與會國藩妥爲商辦屆時另行馳報報聞○撥廣東海關各庫銀二十五萬兩解張亮基軍營備用○癸丑論文煜等籌備遮克敦布軍餉○諭遮克敦布等會剿河套捻匪○是月緩徵直隸武清等二十六州縣歉收糧賦地租山東臨清等五十七州縣德州等四衛上忙額賦地租雜課湖北沔陽等二十六州縣暨武昌衛被水被擾新舊額賦展緩直隸開州等五州縣被災被擾春徵新賦蠲緩江蘇泰州等六十三州縣廳暨淮安等九衛被兵被水被旱新舊額賦雜

課貸黑龍江城歉收丁戶米石吉林三姓被水旗丁銀並官莊民
丁穀價